

EBÈLÙ,

NSHAPITÀ MWISAMBÒMBÒ ²



... bwà kulonga Dîyi Dyèndè dyà mushinga mukolè.

Ndi mufikè, kwènjì mutanci, mvwa mwambùle Bibles yìbidì. Ne mvwa ne muyiikì mukesè wà babìdì ne inābānzà kampānda paanyimà apa, ne ngāmwambidì ne bu mēmè muyiishilè mu yōnsò yìbidì, s'tuvwa mwà kwikala ne cyenabwalu cīmpè menemene. Kādi eci nnkōngamyakù wa cyena Ngelikà, pa nānku kùdì ànu cintu kampānda cīndì muswè kubalamù, dilòdòlò edi. Cìdì—cìdì... Cìdì ndyumvwija dyà ku mwakù ne ku mwakù, kuumukila mu Ngelikà wa ku cibangidilu, kutùma mu Anglais. Ne citu dyambulwisha dyābūngì be bwānyì mēmè misangu ne misangu. Ne ndi muswè ànu kubalamù cintu kampānda, bwalu mpindyewu tudi tulonga mu Mukāndà wà Ebèlù ewu, ne tukāadi tufika mpindyewu ku dyumvwija dyà mu ndòndò menemene.

²¹⁹ Nènku ndi mwambile Mwanèètù Neville, kwènjì ndambù wa tusunsa ne: “Tukāadi tubwela mu citùpà citù bantu bādikoonya mu mutù bāmba ne: ‘Mēmè ncyēna ngiitabuuja aci to.’” Nwamònu anyi? Cyà mùshindù awu nciitukaadi tubwela eci. Ki mwaba wutùdì bacinangile ngwòwò awu.

²²⁰ Mwambi kampānda wākangambila, wāmba ne: “Èè, ndi ngeela meeji ne nekwikalè didikoonya dyà mu mitù būngì cyanānā.”

²²¹ Mēmè kwamba ne: “Ki citùdì baswè kwenza.” Nwamònu anyi?

²²² Bible ùdi mwà kwikala ne dyumvwija ànu òmwèpelè. Kēna mwà kwikala ne muumvwija àbìdì to. Nènku citùpà cimwè cyà Bible cyòci cyāmba cintu, ne citùpà cikwàbò cyà Bible cyāmba cikwàbò cintu, dībà adi cintu kampānda ncipampālāmùke. Nwamònu anyi? Bikèngela cyāmbè cintu aci, ku ntwādijilu too ne ku ndekeelu. Kādi, vùlukāayi ne, mu kulonga kwà Bible, “Ncisokoka ku mēsù kwà beena meeji ne batālame, kādi cibuuulwila bānà bàà mu mabòko,” bwalu ncyà mu Mukāndà wà nyumà.

²²³ Ne Wòwò kī mmukāndà wà ku wesètè to. M'Mukāndà wà ku esètè. Ne kùdì cintu ànu cimwèpelè cìdì mwà kuWùumvwija, n'Nyumà Mwīmpè. Ndi mumanyè ne yōnsò wa kutùdì mmuswè kwamba, ne: “Nyumà Mwīmpè ngudi utwāmbila citùdì twitabuujaMù aci.” Èè, mpindyewu, Mufùndù wōnsò wòwò wùkūmbanangana menemene mùshindù ànu wùmwèwùmwè awu, dībà adi awu n'Nyumà Mwīmpè. Wòwò

kawùyi wùkùmbanangana to, kàdi mwikàle ne mubòlà *apa*, ne mubòlà *apa*, dîbà adi kùdi cintu cipampàlàmu ke mu diitabuuja dyètù. Nènku, kaa, Wôwò's m'Mukàndà wà wùkèmesha.

²²⁴ Mpindyewu, ndi muswè bwà nwénzèku nùnkù patùdi tulonga *apa*. Mpindyewu, bikèngela twètù kuumuka kumpàlà kwà dîbà mu dindà bwà kuya ku Wyoming, bu Mukalenge mwà kwanyisha. Nwatusambidilaayikù.

Ne lumingu lùlwalwà elu, Mwanèètù Graham Snelling, kaaba aka... Ùdipù. Ngààmuumvù, kwènjì ndambù wa tusunsa, ùfila dimanyisha dyèndè. Ne èkèleeziyà ewu ùdi mu dikwàcishangana dyà mu mudimu mu kaabujimà ne ditàbuluja dyèndè. Ne tudi tulòmba Nzambì, bwà àmupèeshe ditàbuluja dinène, bintu byábúngì, byà biyiila ne panshì. Mwanèètù Graham ùvwa mwenzè ditàbuluja bwà Mwanèètù... mu Charlestown emu, Mwanèètù Junior Cash, ne mùvwa mupàtùke bantu bakùdimùne mucìma batwè ku lukàmà, ngeela meeji. [Muntu kampàndà ùdi wàmba ne: “Makùmì mwandamukùlù ne bànaayi.”—Muf.] Bantu bakùdimùne mucìma makùmì mwandamukùlù ne bànaayi. Pa nànkù, bwà aci, tudi tupà Nzambì butùmbi. Nènku tudi ne kweyemena ne nekwikalè nkàmà yitaanu ne makùmì mwandamukùlù ne bànaayi *apa*, mu mwab'ewu.

²²⁵ Mwanèètù Graham mmutwilàngàne naanyi leelù ewu, mwambè ne: “Mpindyewu, Mwanèètù Bill, ndi mutwishìlwe ne udi umvwa ne ncyèna mwab'ewu bwà kubanga mudimu mukwàbò wà wùbèngangana ne wà tabernacle to, bwalu mèmè ndi citùpà cyà tabernacle.” Yéyè ùdi kaaba aka ànu bwà... Mmuumvwè pa mwoyi wèndè ne mmuswè kwenza ditàbuluja, ne Mukalenge umulombola bwà kudyenza. Nènku—nènku ùdi ùbiikila bàdì bakùdimùne mucìma, ne ùdi ne èkèleeziyà, bwà kubàpòngolwelamù ne: “Èkèleeziyà nyéyè ewu udi bu ne nkwenù kumbèlu, wèwè mumùbwele, mukùdimùne mucìma.”

²²⁶ Nènku mmudimu wètù, twètù bu beena Kilistò, bwà kumutwà nyama ku mikòlò ne cyònsò citùdìku mwà kwenza aci. Nènku Mukalenge àbeneshè Mwanèètù Graham. Nènku nwènù, muntu ne muntu, nudi babiikila ne mwoyi mujimà ku masangisha a Mwanèètù Graham lwà kuntweku, ku dyanyisha mu kaabujimà dyà kùdi èkèleeziyà ewu, ne dikwàcishangana mu kaabujimà bwà kumukwàcishakù mu mùshindù wònsò wutùdi mwà kwikala naawù awu, bwà misùukà mijimìne ne bwà Bukalenge bwà Nzambì.

²²⁷ Mukalenge àkubènèshè, Mwanèètù Graham, àkupèeshèku masangisha manène. Kì mmumanyè ne neimanyikè dîbà kaayi to. Ùdi yèyè ànu ùbanga cyanààna. Pa nànkù, Mwanèètù Graham mmupicìle mu maalu bu mèmè mwinè ewu, *mabika* ne *mala* búngì kabùyi kubala. Kì mùdi pànu nànkù. Bìdi bikufikisha ku dyanyisha *mabika* paanyimà pàà mumanè kupicìla mu

mala. Muntu yèyè mudishinde kàdi kushààla mulààdile panshi, awu mmuntu mutulùmùke. Mémè ntu ne dyeyemena pàdi muntu ùjuuka kuulu ùteeta cyàkàbìdi. Ncyà bushùwà. Ndi mutwishiiibwe ne nudi mwà kujingulula cìndi muswè kwamba aci. Mpindyewu, kanùcìpu mwoyi to, lumingu lùlwalwà elu.

228 Mpindyewu, mu Mukàndà wà Ebèlù ewu, katwàkwangatulula mwaba wà kushìndamijila bitùdi twamba dilòòlò edi to.

229 Mpindyewu, mu dyàlumingu dilwalwà, bu Mukalenge mwà kwanyisha, Mwanèètù Neville neàmanyishè. Mwanèètù Cox ewu, anyi umwè wa kùdìbo, neàmwambilè, twètù baalùkile pa dìbà bwà disangisha dyà mu dyàlumingu dilwalwà. Neàcìmanyishilè ku tudyòmbà. Nènku tudi... Nwènú bònsò nwatèèlejaayi ku tudyòmbà twèndè mpindyewu, ne—ne—ne nwabiiikilaayi beena mutumba bèènú bònsò bwà bàatèèleja. Ntu cyà bushùwà ngumvwa disànkà bwà kutèèleja nyiishilù wabò ne ngimbilù wabò, ngimbilù wa tungìmbà tunaayi twà Neville. Ncyèna ngamba nàнку bwalu mmusòmbe apa to. Mémè mwambè nàнку, kàdi nciyi ncyàmbilamù munda mwà mwoyi wányi, ndi mufwányine kwikala mwena lubombo. Ncyà bushùwà. Bivwa mwà kukèngela mémè kunyingalala. Kàdi ndi ngambilamù. Ne mbipicìibwe ne mémè mumwelè kaalutòngà kakesè kàà cilòngò cyà rose mpindyewu pamutù pàà cisùmbù cijimà cyà bilòngò piikalaye ùkaadi mufwè.

230 Musangu kampànda mvwa mpàtuka mu ciibi mwàmwa, ki kulwakù inàbànzà kampànda, e kwambayè ne: “Mwanèètù Branham, kaa, mùshindù mwinè wùdi diyiisha adi dinsànkishe’s wè!”

231 Mémè ne: “Twasàkidila.” Cìvwa cingenzè bilenga.

232 Muntu mukwàbò kuvwilayèpu, kwambayè ne: “Mwanèètù Branham, diyiisha adi ndinsànkishe.”

233 Mémè ne: “Twasàkidila.”

234 Kùvwa muyiishi mukesè mwab’awu, wa ku citùpà cyà ku nord cyà ditunga eku, mu ditunga emu, kwambayè ne: “Nzambì àbeneshiiibwè, ncìtu mémè muswè bantu bántwà makùmbù mùshindù awu to.”

235 Mémè kwamba ne: “Mémè ntu muswè.” Ki mémè ne: “Kùdi dishiiilangana ànu òmwèpelè pankaci pàànyi mémè ne wèwè. Mémè ndimù ne meeji matòòke.” Ncyà bushùwà. Twètù bònsò tutu baswè mèyi malenga àdìbo bàmba bwètù twètù. Ne mémè ndi—ndi ngeela meeji ne mbìmpè bwà kwamba mèyi malenga pa bwalu abu. Ne pawìkalà muswè bwà muntu àmbè mèyi malenga bwèbè wèwè, ikàlà wamba mèyi malenga bwà muntu kampànda mukwàbò. Ki mùshindù wà dyenza cyòci aci, dìbà adi newikalè misangu yònsò ànu wamba bintu byà bitàmbe bulenga byùdìku mwà kwamba bwà bantu bònsò. Ne aci cìdikù cyèenza ne maalu àtambè kwenda bimpè.

236 Mpindyewu, mu cyôci eci, mu dyàlumingu dilwalwà, bu Mukalenge mwà kwanyisha, ku dyànyì dimòna, tudi babwelè, tudi ànu twenda tubwela mu ndòndò wa maalu masokoka manène a Nzambì. Netùbwelè mu bwalu bwà Melekisedekè: Yéyè ùvwa Nganyì, kùvwàYe mufume, kwàkayàYe, cyàkaMwenzekelà ncinyì, ne byònsò bìdi bìtàngilà Melekisedekè abi.

237 Nènku mpindyewu, mu dilòlò dyà mu diisàtù dishààle, Mwanèètù Neville ùvwa mulengè nshapità wa ndekeelu wa Bunzambì bwà kumutù kwà byònsò ne bwakwidi bwà Mukalenge wetù Yesù, bìdi bùbangà ku ntwàdijilu ne: “Nzambì, mu bikondo byà kale ne mu mishindù mishilèshilàngàne wàkaakwila ne baataatù kùdi bapròfetà, mu ditùkù dyà ndekeelu edi mmwakwile neetù ku Mwan’Èndè, Kilistò Yesù.”

238 Pashìshe ùdi ùtúngunuka, ne ùbanga kutèeka bu citembelu cyà ne Yéyè ùvwa Nganyì, ùpweka Nendè too ne ku nshapità mwi5, ku ndekeelu kwà nshapità mwi5.

239 Pashìshe tubangila ku nshapità mwi6, tudi bangàte cyôci eci mu dileesòna dyètù dyà mu dindà emu adi.

Ki bwà cinyì tushiya maalu a ku cibangidilu a dilongesha dyà Kilistò, tuyaayi kumpàlà too ne ku bupwàngàne;

240 Mbanganyì bàvwà diyiisha dyà pa bupwàngàne disànkishe? [Disangisha dìdi dyàmba ne: “Amen.”—Muf.] “Tuyaayi kumpàlà too ne ku bupwàngàne.” Aci ncìvwà diyiisha dyètù, mu dindà emu, mu nshapità mwi6 wa Ebèlù.

241 Mpindyewu tukàadi tubwela mu mwaba wà tubanga kupeta ci—citùpà cyà cilenga cilayà. Kaa, tudi bònsò mwà kwikala biitabàngàne ku mèyi pa maalu aa: pa Bunzambì bwà Kilistò; ne pa ne Yéyè m’Mwànà wa Nzambì; ne mùvwàYe ne Nzambì, ne Nzambì mwikàle Nendè; ne mùvwàYe munda mwà Nzambì, ne Nzambì munda Mwèndè, ne bikwàbò. Tudi bònsò biitabàngàne ku mèyi pa byòbì abi. Kàdi, mpindyewu, kubangila apa, ncyèna mumanyè mutwikalà mwà kwitabangana ku mèyi to. Pa nàнку, nànsha biikàle munyì, ndambù yònsò wa malòòlò, netwikalè mwà kunùpèeshakù mpungà bwà kumfùndila kabèji kakesè bwà kungambilakù meeji anùdi nwènu nwelaPù.

242 Dìbà adi ne bikèngelè bwà mèmè kwandamuna ku nkonko. Nènku bu mèmè nciyi mwà kuyàndamuna to, nèngàmbè ne: “Mwanèètù Neville, udikù wela meeji kaayi pa bwalu abu?” Nèngàmbè ne: “Ki yéyè awu. Àlwàndàmùnèku yéyè.” [Mwanèètù Neville ùdi wàmba ne: “Apu’s mpàngàabalà cyena Ngelikà.”—Muf.] Dìbà adi mpùikalàye mwà kubala mu nkòngamyakù, kupàtulamù cyena Ngelikà. Ngeela meeji ne dìbà dyàkànyì dyà mèmè kucyènza pàànyì.

243 Kàdi, mpindyewu, bu twètù mwà kufikakù ne kwikala ne meeji matòoke menemene, ne kulwa cyà bushùwà bwà kiipàcilà kàmwè, mbwena kwamba ne, kàà kuyiila. Mèmè ndi muswè

pàànyì kuyiila. Ne Bible mmufùndiibwe, bambè ne: “Bìdi... Mifùndu kí nyà muntu ùdyùmvwijila pàà nkààyendè to.” Mbwena kwamba ne Mufùndu wùdi ne cyà kuumvwija Mufùndu. Nwamònu anyì? Mufùndu wònsò wùdi ne cyà kuumvwija mukwàbò, ku ntwàdijilu too ne ku ndekeelu kwà Bible, bwà kucivwija cintu cimwèpelè cinène. Bwalu, Nzambì kèna mwà kushintuluka to, bwalu Yèyè n’Nzambì udi kàyi ùshintuluka to.

244 Mpindyewu: “Tushìya...”

Ki bwà cinyì tushìya maalu a ku cibangidilu a dilongesha dyà Kilistò, tùyaayi kumpàla too ne ku bupwàngàne,...

245 Ntu muswè pàdi Pòlò wàmba bintu abi apu. Pòlò kàvwakù muntu uvwa munangè kushààla kaaba kàmwè ntàntà mupitèpìte bule to. Ùvwa munangè kuya kumpàla, ùtàmba kuya mu ndòndò. Musangu kampànda, mu Mifùndu, wàkamba ne: “Mémè, mpwà mwoyi bintu bikaadi bipite abi, ndi nkolesha mutàngìle ku kiipàcilà kàà dibìikila ditùmbùke.” Nwamònu anyì? Mmutùngùnùke ne kukolesha.

246 Apa mmwambè ne:

Mpindyewu tupwà mwoyi maalu a ku cibangidilu a dilongesha dyà Kilistò (ne Yèyè ùvwa Nganyi, cìvwàYe), tùyaayi kumpàla too ne ku bupwàngàne,...

247 Mpindyewu twètù, dyàmbedi, tuvwa baswè kujandula cyà ne: “Tudikù bafwànyine kwikala bapwàngàne anyì?” Ki twètù kusangana, mu Mifùndu mu dindà emu, Maatàayi 5.28 ne, Yesù wàkamba ne bìvwa bikèngela bwà twètù “kwikala bapwàngàne ànu mùdi Nzambì mupwàngàne amu,” cyanààna katwèna bafwànyine kubwelakù to.

248 Pashìishe twètù kusangana ne tuvwa, muntu ne muntu, “balela mu mpèkaatù, bafwimba mu bubì, balwè pa buloba twamba mashimi.” Nènku kakùvwakù kantu kashìndàme nànsha kàmwè kutùdi to, pa nàнку mmunyi mutùvwàku bafwànyine kwikala bapwàngàne?

249 Mpindyewu citùdi basangàne ncyòci eci díbà adi, cyàkàbìdi, patùdi tubala, twangata Mufùndù ne Mufùndu, ne: “Yesù, ku mulàmbù wùmwè, wàkapwàngaja, bwà kashidi, Èkèleeziyà Wendè.” Yèyè...Tudi bapwàngèene díbà adi, ku Kilistò. Nènku tudi basùlùdiibwe ku cilumbulwidi, ku Kilistò. Katwàdyàkufwàku to, ku Kilistò. Tudi bajimije lufù bapetè Mwoyi, ku Kilistò; kakùyì ku èkèleeziyà kampànda to, kakùyì ku dìngumba kampànda to, kakùyì ku cintu kampànda cyà cìkùminà to, kakùyì ku dyakula dyà mu myakulu to, kakùyì ku dyela dyà mbilà to, kakùyì ku dizakala to, kakùyì ku dijà dyà maja mu Nyumà to, kàdi ku ngàsà.

250 Nzambì ngudi ubìikila udiYè muswè. Ne byònsò nku disungula, mutùdi tusangana nàнку. Tudi tusangana ne: “Kí

ng'ewu udi muswè bwà kusùngidiibwayè awu to. Kí ng'ewu udi muswè anyì ewu udi unyeema lubilu to; Nzambi ngudi uleeja luse." "Ne muntu nànsha umwe kèna mwà kulwa kùdi Yesù, pàdi Nzambi kàyì mumukòke dyàmbedi to." Nànku ncinyì cidì cikèngelà bwà wènzèmu's, twamb'eku twamb'eku? Kwèna ne cyà dyenzamù to nànsha cikesè. Wèwè udi pambèlù pàà cimfwànyì aci, cyònsò mu kaabuujimà.

²⁵¹ Twàsangànyì ne muntu kí nyéyè utukù ùkèba Nzambi to. Nzambi ngutu ukèba muntu. Ne pashìishe, twàsangànyì, dìbà adi ne, Nzambi ngudi mushimì wùmwèpelè wà Mwoyi wà Cyendèlèèlè. Twàsangànyì ne cyònsò cidì cyà Cyendèlèèlè kacýèna ne ntwàdijilu anyì ne ndekeelu to. Ki bwà cinbyì, tudi tusangana ne ifèrnò ùvwa ne ntwàdijilu, ne ùdi ne ndekeelu. Ne kùdi ànu. . . Muntu nànsha umwe kèna mwà kwambakù ne ifèrnò ngwa kashidi to; bwà kashidi, èyowà, bwà kashidi, kàdi kí ngwa Cyendèlèèlè to.

²⁵² *Kashidi* n' "cipòdòlò cyà cikondo." Bible ùdi wàmba ne: "Kashidi ne kashidi." Nènku nùkebààyi bì nùsanganè *kashidi* ní kèna ùmvwija "cipòdòlò cyà cikondo." Yona wàkamba ne ùvwa "kashidi" mu difù dyà mushipa wà bàlenà. Ne mu Mifundù mikwàbò yàbùngì, *kashidi* ùdi ùmvwija ànu "cipòdòlò cyà cikondo."

²⁵³ Kàdi, *Cyendèlèèlè*, mbwena kwamba ne "kashidi"; aci mbwena kwamba ne kashidi ne kashidi ne kashidi ne kashidi ne kashidi. Aci ki Cyendèlèèlè. Nènku tudi tusangana ne ifèrnò kí ngwa Cyendèlèèlè to, kàdi ngwa kashidi. Nènku kabingilà nkàà ne, bìkèngela nùtabaleelè myakù ayi, mpindyewu. Cyanààna, nudi nupeta cibwejàkàjì. Mpindyewu, vùlukàayi ne, ànu bintu bìvwà kabiyi ne ntwàdijilu abi, mbidì kabiyi ne ndekeelu. Ki bwà cinyì, Yesù wàkamba ne: "Ewu udi utèèleja Mèyi Àànyì ne wìtabuuja Ewu udi muNtùme awu, ùdi ne Mwoyi," wà kashidi anyì? Aci cidì cyùmvwika cìmpè anyì? To. "Ùdi ne Mwoyi wà Cyendèlèèlè." Ne mwakù *Cyendèlèèlè* wùdi n' "Nzambi." Mwakù awu, ki wòwò ewu mu nkòngamyakù wa cyena Ngelikà ne: *Zoe*, "Mwoyi wà Nzambi" munda mwèbè. Nènku wèwè udi wa Cyendèlèèlè ànu mùdì Nzambi wa Cyendèlèèlè amu, bwalu udi ne Nzambi munda mwèbè.

²⁵⁴ Ngiikàdìlù webè wa kale awu mmufwè, ngiikàdìlù wa pa buloba awu, ne udi mulwè cifùkiibwà cipyacipyà. Nènku majinga èbè, mwoyi wà kale wùvwa ne ntwàdijilu pààkapwidijà Nzambi mweyelu mu mimpèmpè yèbè apu, pawàkalediibwà, mwoyi wà ngiikàdìlù wa musunya awu wàkafwà. Nènku wòwò wùvwa ne ntwàdijilu ne wùvwa ne ndekeelu, ne wàkafwà ne wàkuumushiibwa bwà kashidi, ngiikàdìlù wa kale awu. Nè Nzambi mmubwelè ne Ngiikàdìlù mupyamùpyà. Dìbà adi, dinanga, disànka, ditalala, mwoyi mule, musàngèelu, ditalala, lutùùlù, ne bupòle, ne musàngèelu, abi mbibwelè; ne mbyangàte kaaba kàà budimù, ne ciiji, ne lukinu, ne—ne ditembangana,

dikòkangana, ne bintu byònsò abi. Mbyangàte kaaba kààbi, pawùmùkù ku lufù kuya ku Mwoyi apu. Nudi bacyùmwè, ne ntèmà yònsò, mpindyewu anyi? [Disangisha didi dyàmba ne: “Amen.”—Muf.]

255 Pa nàнку, tèèlejàayaaku. Kùdi mùshindù wà Mwoyi wà Cyendèlèèlè ànu wùmwèpelè. Wùpetàayi. Mbwena kwamba ne, Nzambi nkàayendè ngudi ne Mwoyi wà Cyendèlèèlè. Ki cìdi Bible mwamnbè. Nzambi nkàayendè ngudi ne Mwoyi wà Cyendèlèèlè. Kàdi byòbì ne muntu neàkengè mu ifernò, bwà kashidi, bikèngela ikalè ne Nzambi, wa Cyendèlèèlè awu. Kàdi mèmè ndi ngamba ne kùdi . . .

256 Mpindyewu, vùlukàayi ne, ncyèna ngamba ne kakwèna ifernò wa ùlàkuka kapyà to. Ifernò wa ùlàkuka kapyà ùdikù, kapyà ne soufre. “Mùdi mu—musàndà . . . kapyà kakàyikù kàjimiibwa ne musàndà kawùyikù ùfwa to,” wa kapyà ne soufre, dinyooka. Mmufwànyine kunènga ntàntà wa bidimu mùliyaalà mujimà. Kàdi ùdi ne cyà kwikala ne ndekeelu, bwalu ifernò wàkafùkiibwa bwà dyabùlù ne banjèlò bèndè. Nènku byònsò bìdì Nzambi mwinè, Yèyè mwinè, ùvwa ku cibangidilu awu, byònsò mbifùmìne kùdi Nzambi. Pàvwà Nyumà mwinè . . .

257 Anjì angàtaayi ànu *Nyumà* wa dinanga, uvwa mpokolo munène wa Nzambi, mukezùke, kàyi musambakaja awu. Ku aci, kubwelakù dinanga *dinyangakaja*. Pashìishe kubweladi mu dinanga *dyà buntu*. Pashìishe kubweladi mu dinanga *dyà disangila* dyà mulùme ne mukàji. Pashìishe kubweladi mu mananga makwàbò, mananga ne mananga, ne ditùngùnùke ànu ne kunyanguka too ne mùdìdì dìlwa kushàala ànu *bukooyà* bwètù ebu. Kàdi bintu byònsò abi bìvwa ne cibangidilu. Kàdi dìngà ditùku nebyàlukilè buludi ku cyà ku cibangidilu aci; ncyà Cyendèlèèlè; kùdi dyalakana, dinanga dyà buntu, dinanga dyà nkùkà yà mikolè, mananga ònsò awu neikalè ne cyà kujika.

258 Miitabuuja ònsò a budìngìbudìngì a Diitabuuja aa neikalè ne cyà kujika. Kùdi Ditabuuja dilelèlè òmwèpelè. Bikwàbò byònsò nebiikalè ne cyà kujika. Bìvwa ndinyangakaja dyà mpokolo mulelèlè ewu.

259 Pa nàнку, ki bwà cinyi, ifernò, dikènga, dikènga kî ndyà Cyendèlèèlè to. Dikènga dyàkatwàdiibwa mbwà bwalu bwà mpèkaatù, ne mpèkaatù kubwejayè dikènga. Ne pàajikà mpèkaatù, dikènga nedìikale pàadi ne cyà kujika. Ne nekùlwe cikondo cìikalà bangènzàmpèkaatù, bàtù kacya kabàyikù biitàbe Kilistò abu, paanyimà pàà bamanè kunyookiibwa pàmwàpa munda mwà bidimu mìliyò nkàmà, . . . ncyèna mumanyè to, pàmwàpa munda mwà mìliyalà yà mìliyalà's. Ncyèna mwà kumanya to. Kàdi nebiikalè ànu ne cyà kufika ku ndekeelu, musangu kampànda, bwalu kabyèna byà Cyendèlèèlè to.

260 Mpindyewu, netùkoleshè mpindyewu, batàngile ku bupwàngàne. Mpindyewu tèelejàayi, patùkaadi tubwela mu Dyiisha adi apa.

.. katùciyi kàbìdì tutèèka bishìmikidi byà kanyinganyinga kàà ku midimu mifwè, ne kàà diitabuuja kùdì Nzambì to,

Kàà dilongesha dyà mabàtiiza, . . . ditentekelangana dyà byanza, . . . dibùkà dyà bafwè, ne . . . dilumbulwisha dyà cyendèlèlè.

261 Mpindyewu tèelejàayi. Tudi ne bibìdì . . . Tudi ne cimfwànyì apa, mpindyewu. Mpindyewu apa mene ki patwàpetelà ndambù wa mapangakana manène. Mpindyewu bikèngela nùmonè mwaba wùdì cimfwànyì. Pòlò ùdì ùteeta, apa, bwà kutàpulula *mikenji* ne *ngàsà*. Tudi ne bimfwànyì bìbidì: cimwè, cyà musunya; cimwè, cyà nyumà. Nènku Pòlò ùdì ùteeta bwà ku—kudisàka kule pankaci pàà bibìdì abi, bwà kuleeja beena Yudà. Mukàndà ewu mmutùmina beena Ebèlù. Ne mukàndà mujimà wà Ebèlù ewu mbwà kuteeta kuleeja citebelu cyà Dipungila Dikùlukulu mùdìdì cifwànyikijilu cyà Dipyadìpyà. Pa nàнку, nudi kaaba aka ne bimfwànyì bìbidì byà dyangata.

262 Mpindyewu tèelejàayi ne ntèmà patùdì tubala apa. Mpindyewu mmwambè nùnku:

.. tushìya maalu a ku cibangidilu a dilongesha dyà Kilistò, tuyaayi kumpàla too ne ku bupwàngàne, . . .

263 Mpindyewu, tuvwa bangàte aci mu dindà emu, mùshindù wutùdì bapwàngaja. Bapwàngaja, kakùyì mpatà to katùyì katobà ne katùyì kadyuwù, katùyì mpèkaatù nànsha umwe pambidi pèètù to. Wèwè udi kumutù kwà diteeciibwa anyi? Nànsha kakesè. Udi wenza mpèkaatu ditùkù dyònsò edi anyi? Èyowà's, mukalenge. Kàdì, pààbì's, tudi bapwàngaja bwalu tudi munda Mwèndè. Ne Nzambì kì mmufwànyine kàbìdì kutùlumbulwisha mu kantu nànsha kàmwè to (pàtupù kì mmufwànyine kwikala mwakàne to), Ùkaadi mumanè kutùlumbulwisha munda Mwèndè. PààkalumbulwishàYe Kilistò apu, Wàkandumbulwisha mèmè, Wàkakulumbulwisha wèwè. Nènku Kèna mwà kundubulwisha cyàkàbìdì to, bwalu Yèyè wàkambula dilumbulwisha dyànyì pùikalàbì ne ndi mupikùdìbwe.

264 Nènku mèmè ndi ne kabèjì kàà mushinga bwà kuleeja ne ndi mukùùle dìbà dyànyì dyà ku dibòko ku nzùbu wa dyeyeka bintu, muntu àdìdingè ààlukilè naadi ku nzùbu wa dyeyeka bintu aku, pàànyì ne kabèjì kàà mushinga aku. Nkàadi mumanè kudìkùùla.

Nènku dyabùlù yèyè ànu mudìdinge kuteeta bwà kungeela dinyooka pambidi, mèmè's ndi ne kabèjì kàà mushinga kàdì kàleeja ne ndi mupikula. Èyowà's, mukalenge. Kakùcyèna kàbìdì dilumbulwisha nànsha! “Ewu udi utèeleja Mèyì Àànyì, ne witaabuuja Yèyè udi muNtùme, ùdì ne Mwoyi wà Cyendèlèlè,

ne yêyè kàadyàkupitakù ku cilumbulwidi to, kàdi wàmányi kuumuka ku lufù wàyi ku Mwoyi.” Ki kabèjì kàányi kàà musinga nkòkò aku. Yêyè ngudi mufìle mulayi.

²⁶⁵ Mpindyewu, mpindyewu cimfwànyì aci, kaaba aka.

..katùciyi kàbìdì tutèèka bishimikidi byà kanyinganyinga kàà ku midimu mifwè, ne . . . diitabuuya kùdì Nzambì,

..dilongesha dyà mabàtiiza, . . . ditentekelangana dyà byanza, . . . dibùkà dyà bafwè, . . . dilumbulwisha dyà cyendèlèlè.

²⁶⁶ Mpindyewu, vùlukàayi. Nuvwa bamòne mwakù wùdìbo bambùlùle awu anyi? Tuvwa bakwàte naawù mudimu mu dindà emu ne: “Dilumbulwisha dyà Cyendèlèlè.” Pàdì ànu Nzambì wàkula musangu wùmwe, Ncyà Cyendèlèlè. Kacyènakù mwà kushintuludiibwa to, nànsha kakesè. Pa nànkù, dilumbulwishiibwa ndyà Cyendèlèlè, didi ànu dilumbulwishiibwa. Nànsha twètù ne mwoyi, ne lukòngò kaayi, lukòngò lùmwe nelwìkalèku ne mwoyi, ne mukenji wùmwe newìkalèku ne mwoyi, ne cìdi mbwà kashidi, anyi bwà cikondo kanà cyònsò, ne cikampàndà ne cikansanga. Kàdi dilumbulwisha dyà Nzambì didi ànukù Cyendèlèlè, bikèngela Ìkalè nànkù, bwalu mMujìkùle Dìyi. Pàdì Nzambì ùjìkula Dìyi, Dìdì ne cyà kwìkala dyà Cyendèlèlè. Ncyà bushùwà.

²⁶⁷ Mpindyewu ngànjì nnùbadìlèku cyòci aci mu cyena Ngelikà. Tèèlejàayi mùdìci cibadiibwa.

Ki bwà cinyi tushìya—tushìya maalu a ku cibangidilu a malongesha a Kilistò, udi cibawu cifuta Awu, bìwwa bikèngela bwà twètù kukolesha—kukolesha too ne ku. . .

Mpindyewu, ncyèna mwà kucibala to. Ncibwicidile. “Ne katùyì kàbìdì tutèèka mmwènekèlu. . .” Ki bwalu mbwòbù ebu’s.

..katùyì kàbìdì tutèèka mmwènekèlu wa kwìsùkwìsù wa dilongolola dyà ku midimu yìdì yìkèba lufù.

²⁶⁸ Mpindyewu, nkòngamyakù ewu kèna ùfila ànu menemene dyumvwija kampànda to, nànsha kakesè. Cìdì ànu mwakù wà cyena Ngelikà bwà cìdì Anglais wàmba’s. Nènku ncyambè ne: “Mpindyewu katwèna baswè. . .” Tèèlejàayi apa, nwamònu’s.

..katùyì tutèèka bishimikidi byà dilongolola dyà ku midimu yìdì yìkèba lufù.

²⁶⁹ Mpindyewu bu nwènù mwa kulama aci mu meeji, cìdiye wamba apa eci, ne: “Mmwènekèlu yà kwìsùkwìsù yà dilongolola yìdì yìkèba lufù.” Pòlò mmwambè ne: “Tushìya maalu a ku cibangidilu, tuyaayi too ne ku bupwàngàne, katùyì kàbìdì tutèèka bishimikidi byà kanyinganyinga kàà ku midimu mifwè

ne yà diitabuuja kùdì Nzambi: malongesha a dibàtiiza, ditentekelangana dyà byanza, dibìikà dyà bafwè, dilumbulwisha dyà Cyendèlèlè.” “Mmwènekèlu yà kwìsùkwìsù yà dilongolola yìdì yìkèba lufù,” ki cìvwà myakù mijaalàme. Mu bushùwà bwà bwalu cyôci aci ki cìdì Pòlò mufunde. Nudi numòna cidiye ùteeta bwà kwenza anyi?

270 Mpindyewu, bintu byònsò ebi, bu mùdì mabàtiiza: ewu mubàtìjìibwe cyâdì muulu, ewu cyâdì panshì, ewu mu dìnà dyà Taatù, Mwànà ne Nyumà Mwîmpè, ewu mu dìnà dyà Yesù, ewu mùshindù *kampànda*, ne mùshindù *kansanga*, ne tuubintu tukesè twònsò tushìlèshìilàngàne twà mabàtiiza etu.

271 Ne byà ditentekelangana dyà byanza abi ne: “Nzambi àbeneshiibwè, mèmè ndi ne dipà dyà ditentekelangana dyà byanza. Àlèluuyàh! Wèwè, udi mwà kuCìpeta mùshindù *kampànda*. Àlèluuyàh!”

272 Kutèeka byònsò abi ku luseke, bwalu abi mmidimu mifwè, byà malongolola ebi, kulongolola’s. Nwamònu anyi? Ùdi wàkula bwà kakwàbò kasumbu. Mpindyewu yèyè mmwambe ne: “Tùumukàayi ku abi abi, ne tùyaayi too ne ku bupwàngàne.” NwaCyùmvù anyi? [Disangisha dìdì dyàmba ne: “Amen.”—Muf.]

273 Kàdì èkèleeziyà’s ki kujàngulukilayè mu byôbì bintu abi eku. S’ki cìvwàbò bôbò bàteeta kwenza. Èkèleeziyà wa beena Ebèlu wa ku cibangidilu ùvwa ùteeta kwamba ne: “Èè, mèmè ntu mubàtìjìibwe mu diinyijìibwa dyà mu màyi, ne—ne ntu mupetè *cikampànda*, ne *cikansanga*, ne bintu *kankènga* byònsò ebi.”

274 Kwambayè ne: “Mpindyewu, tèekaayi byònsò abi ku luseke, nubìshiya paanyimà.” Kàdì, mpindyewu, wàkamba ne kabìvwa bìkèngela bwà twètù kubyènza anyi? Mpindyewu tèèlejàayi cidiye mwambè pa bwalu abu.

Kàdì cyôci eci ncitwènzà, . . . bu Nzambi mwà kwanyisha.

275 Ne cyà ku cibangidilu ncyambè cintu cìmwècìmwè aci.

Cyôci eci ncitwènzà, bu Nzambi mwà kutwànyishila, nwamònu’s.

Cyôci eci ncitwènzà, . . . Bu Nzambi mwà kutwànyishila.

276 Mabàtiiza, ditentekelangana dyà byanza, ne bikwàbò, kàdì abi kî mbipwàngàne to. Abi bìdì ànu dyenzulula dyà mu musunya. Ne mwaba awu ki wùdì èkèleeziyà yìcishìila mu njila, leelù ewu, pa dyenzulula dyà mu musunya apu. Umwe wa kùdìbo mmwambè ne: “Kaa, èè, màyi, mwakù *dibàtiiza* mbwena kwamba ne *cikampànda* ne mbwena kwamba ne *cikansanga*.”

277 Ki bènza malongolodi mwab’awu: ki ewu ùmyaminangana màyi, mukwàbò ùpòngolwelangana màyi, mukwàbò ùbàtiizangana cyâdì panshì, mukwàbò cyâdì muulu, ne bintu byònsò abi; bàmwè bàà kùdìbo bàtentekela babèèdì byanza, ne

bakwàbò bàvwijangana bàpostòlò, ne bakwàbò bàvwijangana baprófètà ne bikwàbò, mu kubàtentekela kwà byanza; ne bàyiisha dibìikà dyà ku bafwè, ne biinè abi biikàle ànu bìmpè's; ne Bunzambi bwà kumutù kwà byònsò bwà Kilistò, aci's ncìmpè. "Kàdi," mwàkambàye, "byònsò ebi mmalongolola a mmwènekèlu wa kwìsùkwìsù. Tudi ànu tulongolola. Mpindyewu tuyaayi kumpàla too ne ku bupwàngàne." Nudi bumvwè cimfwànyì aci anyì? [Disangisha dìdì dyàmba ne: "Amen."—Muf.]

278 Mpindyewu tàngilàayi. Apa ki pàdì citùpà cyà ndòndò cilwa mpindyewu.

Bwalu kabyèna mwà kwenzekakù to bwà aba bàkaavwà bamana kukenkeshila musangu kampànda, ne bamanè kulabula ku dipà dyà ku dyulu, ne barwìjùbwe baabanyanganyi bàà Nyumà Mwìmpè,

Ne balabùle ku dîyì dîmpè dyà Nzambi, . . . ne bukolè bwà cikondo cìcìlwalwà,

Bòbò badishinde, bwà kubààlujulula cyàkàbìdì ku kanyìnganyìnga; pa kumòna ne bàdì bàpoopela cyàkàbìdì bwàbò bòbò Mwànà wa Nzambi ku nkùrusè, ne bàmfwìsha bundù bwà patòòke.

279 Mpindyewu, nwènu beena ne ànu mikenji ndi mumanyè cinùdì naaci mu mitù yènu aci mpindyewu, kàdi nudi mu ntùpàkànyì. Nwamònu anyì? Èyo. Mèmè ndi mwimàyine pa eci, ne Bible ùdì ùcìshindika, ne: "Nzambi Yèyè ànu musùngile muntu, yèyè mmusùngìdìibwe musangu wùmwè Cyendèlèlèè." Kanwènakù mwà kuCyàmbishisha cìngà cintu to.

280 Muntu kampànda mwitabi wa maalu ànu mùdìwu mafùndìibwe mmulwè kùndì, ànu àbìdì aa, kwambayè ne: "Ngàakupètèdì pa kantu kàmwè, Muiishi Branham. Ngàakupètèdì pa kàmwè. Udi mwambè ne: 'Muntu yèyè ànu musùngìdìibwe, kì mmufwànyìnekù kujiìmina' anyì?"

281 Mèmè ne: "Aci's ncìdì Nzambi mwambè."

282 Yèyè ne: "Ndi muswè nkukonkèku cintu kampànda. Shawùlà's ùvwa mupròfètà, ne wàkamba ciprófètà. Ne wèwè's udi mumanyè ne yèyè ùvwa mwela maanyì wa Nzambi. Bible ngudi mwambè nànkù. Kàdi's wàkadishèbeya, ne wàkajìmina."

283 Mèmè ne: "Wàkajìmina?" Mèmè ne: "Bible's mmwambè patòòke ne yèyè ùvwa 'musùngìdìibwe.' Paanyimà pàà yèyè mumanè kulwa mwena lukunà wa Nzambi, yèyè's ùcìvwa ànu musùngìdìibwe. Bible ngudi mwambè nànkù. Ne, byòbì biinè, yèyè kàakadishèbeyakù to. Mwena Pelèshètè ngwàkamushèbeya, ne Davìdì kushebeyayè mwena Pelèshètè awu bwà dimushèbeya dyèndè adi. Yèyè wàkapònena pa mwelè wèndè wà mvità, pa difumà dyèndè, mwelè wà mvità, kì, ncyàkenzàye. Kacyàkamushèbeya to. Kàdi mwena Pelèshètè

ngwákamushebeya. Nènku musangu awu pàakayà Shawùlà kwà mwamùlopò, ne awu kubikidishayè nyumà wa Samwèlè, bwalu kàvwa mubwelè mu Butùmbi to, ùvwa mu mpàlàdiizò mwinshì mwà mashi a bimpàngà byà ngombe ne byà mbuti àvwa kaayi mwà kuumusha mpèkaatù to. Kàdi byàkakèngela kwikalayè ne mwaba wà dindila, wùdi wùbìikidiibwa ne mpàlàdiizò, too ne pàakabwelàye.”

284 Mwaba awu ki wunùdi nwènù beena Katòlikè bapetèle cibwejàkàji. Nwamònu anyi? Mpindyewu, kakucyèna kàbìdi mpàlàdiizò mpindyewu to. Twètù tuyààya buludì mu Bwikadi bwà Nzambì.

285 Nènku mwamùlopò wa mu Enè-Dô awu pàakabìikidishayè nyumà wa Samwèlè apu, s’ki yèyè ewu pwàà. Ki kupònayè mutwè mpàla panshi, ne kwambayè ne: “Wandìngi bwà cinyi?”

286 Kabiyi ànu ne Shawùlà ùvwa mwimàne kaaba aku to. . . Ndi muswè kwamba Samwèlè’s, muvwàle mùzàbì wèndè wà mupròfetà awu, ùcìvwa ànu mupròfetà. Yèyè ne: “Cyùdi mumbìikidile bwà kupàtuka mu diikisha dyànyì ncinyi,” yèyè ne, “pèbèè mushààle mwena lukunà wa Nzambì?”

287 Yèyè ne: “Èè, Ulimà kàcyèna kàbìdi muswè kwakula naanyi to. Mupròfetà kàcyèna kàbìdi mwà kungambila cipròfetà to. Nànsha cilòòtà ciine ncicyèna mwà kucipeta to.”

288 “Èè,” mwàkambà Samwèlè, “wèwè’s ukàadi mulwè mwena lukunà wa Nzambì. Kàdi mààlaba mvità neyìkudimukè, ne neùfwè mààlabà. Ne patwàmbà kufika dìbà edi, mààlabà dilòòlò, newikalè naanyi.” Pìikalà Shawùlà mujimine, ne Samwèlè pèndè’s ùvwa mujimine, bu mùvwàbo bùbìdi bwàbò pàmwè. Cyà bushùwà’s. Mmùdi Bible mwambè.

289 Mpindyewu, udi mwà kwikala wèwè yònsò mulùndùke ne musalùke, mu kwakula kwà mu myakulu, dyela dyà mbilà, didikùpà dyà eku ne eku adi, dizakala, dinyeemakanangana dyà ubànda upweka ne kajila. Neyèna cilumbu ne byòbì abi to. Kàdi udi mwà kudìitabuujiya mùdi musùngidiibwe pèbèè kùyi musùngidiibwe to, kwèna musùngidiibwe nànsha. Nsòmbelu webè ngwàjaadika cyùdi. Yesù wàkamba ne neàjaadikè: “Ku mamuma àbò nkunwàbàmanyinà.” Nsòmbelu webè ngwàjaadika ní udi musùngidiibwe anyì kí mmwòmò, nànsha kùyikù mubuulùle mukana to. Yèyè ngwàjaadika cyùdi.

290 Kàdi dilùnduka dyònsò ne disaluka ne diya kashàala wa mu èkèleeziyà edi ne: “Kàbìdi mémè’s ntu mubàtìijìibwe mu Dìna dyà Yesù, àlèluuyàh, ndi mumanyè ne ndi Nèndè,” aci kacyènakù ne cìdìci cyùmvwija nànsha.

291 “Ntu mubàtìijìibwe, mu dìnà dyà Taatù, Mwànà, Nyumà Mwìmpè, cyàdì panshi, misangu yisatù. Ndi Nèndè.” Aci kacyènakù ne cìdìci cyùmvwija nànsha.

²⁹² Pòlò mmwambè ne: “Tùyaayi kumpàla too ne ku bupwàngàne mpindyewu.” Tudi twakula bwà bupwàngaja. Twètù batùngùnùke ne cyòci eci, nenùjandulè ne, bàdi bapwàngaja m’Basungula. Mémè nènñjAADIKILÈCI, mu katanci kakesè emu, ku Bible. M’Basungula bàvwà Nzambi, kumpàla kwà difùkà dyà dyulu ne buloba, mumòne yònsò wa kùdibo. Ki kutùmaYè Yesù bwà kupikulaYè cisàmbà aci, kí mbuloba bujimà to. Úvwa muswè nànkù, kàdi byàkakèngela bwà kupengaYè njila bwà bòbò abu. Ne mùshindù wùmwèpèlè wùvwàYe mwà kucyènza, wùvwa ngwà kutùma Kilistò; bwà kulwaYè, kwenza difuta dyà cibawu cyà mpèkaatù yètù, bwà aba bàvwà basungùdiibwe abu, Wàmòna mwà kubàfikisha kùdiYe, mu Butùmbi.

²⁹³ Nudikù bafwànyine kudifwànyikijila Nzambi ùlombola birò Byèndè ne mapepelela mùshindù awu, byà wàmba ne: “Èè, pàmwàpa muntu kampànda neàpetèku meeji a dibungama dyàbùngì Bwànyì, pàmwàpa neàlwe ne neàsungidiibwè” anyi? Kwòkù disèngeleela, wèwè ngudi ne cyà kusèngeleela, kí n’Nzambi to.

²⁹⁴ Nènku dibà adi, Kilistò kufwàYe bwà kusùngila aba bàvwà Nzambi, ku didyànjila-kumanya, musungùle bwà kutwilanganabò Nendè mwàmwa kabàyi ne katobà anyi ne mufudì to. Kumpàla kwà difùkà dyà dyulu ne buloba, Yèyè wàkakumòna mu Butùmbi. Aci ncìdi Bible mwambè, mu Efèsò, nshapità wa kumpàla. Nshapità mwi5, mvensà wa kumpàla. Nzambi wàkadyànjila kulongolola ku didyànjila-kumanya.

²⁹⁵ Mpindyewu, piikalàbi ne Nzambi wàkenza nànkù, mudyànjlile kutùlongolola kumpàla kwà difùkà dyà dyulu ne buloba, ne mumanyè yònsò wa kutùdi mu dìnà, kumpàla kwà difùkà dyà dyulu ne buloba, ne mutùsungùle bwà Mwoyi wa Cyendèlèlè, ne mutùme Yesù Kilistò bwà kutùpikula, mu mùshindù wà ne, kùkaadi bidimu binunu bìsambòmbò, Yèyè wàkatùmòna, bwà twètù kumwènèka ku butùmbi Bwèndè mu Butùmbi, mmunyi mùdiku mwà kwikala mujimine’s?

²⁹⁶ Mpindyewu, wèwè musùngidiibwe, udi musùngidiibwe. Nzambi Yèyè mukusùngile dilòlò edi, mumanyè ne neÀkujimijè mu bidimu dikùmi kuumukila ku leelù ewu, Yèyè’s ùdi munkaci mwà kunyangakaja kiipàcìlà Kèndè Sungasunga; Nzambi wa kàyi mikàlu, wa Bukole bwònsò, wa Cyendèlèlè, wa lungènyì lwà kashidi awu, kàyi ne dimanya dikùmbàne dibà adi bwà kumanya wèwè ní wakàdamana anyi kwakukàdamana. Pashiishe, pàkaadiYe ùkusùngila, wàmba ne: “Èè, Nèmmwèlè ku diteeta, bwà kumòna cyènzàye,” dibà adi Yèyè kí mmumanyè ndekeelu kacya ku cibangidilu nànsha. Nzambi mmumanyè cidiYe wènza, wèwè kùlubakaji meeji bwà aci to. Mémè ne wèwè mbàdi balèndukà mu lwendu. Nzambi Yèyè mmumanyè cidiYe wènza. Ne Yèyè ùvwa mumanyè ne twètù . . . ní tuvwa mwà kukàdamana, anyi citùvwà mwà kwenza aci.

²⁹⁷ Mpindyewu, Bible mmwambè ne, Esawù ne Yakòbò, kumpàlà kwà mwànà ne mwànà kulediibwayè, Nzambi wàkamba ne: “Ndi munangè umwe, ne mukine mukwàbò,” kumpàlà mene kwà kabàyi banjì kweyela mweyelu wàbò wà kumpàla awu to, bwà disungula Dyèndè dyàmòna mwà kushàala dilelèlà.

²⁹⁸ Abraham ùvwa nganyì? (Netùfikè ku bwalu bwèndè mu katanci kakesè emu, kwinshì eku.), yèyè ùvwa nganyì, bwà Nzambi àmubiikilè, ùmusungila kakùyi ní ncinyì ní ncinyì to. Nzambi ùdi wènza cipungidi ne muntu, muntu ngudi ushipa cipungidi cyèndè. Kàdi Nzambi wàkenza Cipungidi eci ne Yèyè mwinè, ne kudicipilakù, ku Yèyè mwinè, muntu yèyè kèna ne cyà dyanzamu to. Ndidyanjila-kumanyà dyà Nzambi Sungasunga, Yèyè's wàkacyèna, twamb'eku twamb'eku.

²⁹⁹ Mpindyewu, wèwè udi wamba ne: “Èè, Mwanèètù Branham, dîbà adi mèmè mulwè mwena Kilstò, ndi ànu mwà kwenza cyònsò cîndi muswè's?” Kakùyi mpatà to. Pawikalà mwena Kilsto, enzà cyònsò cyùdi muswè. Kàdi mèmè ndi nkujaadikila ne, kwàkwikala ne dijinga nànsha dikesè dyà kwenza bibi to. Udi wenza ní ncinyì cyònsò. Mèmè ntu ngenza ànu cîntù muswè aci. Kàdi mèmè nkwàcila Mukalenge mudimu bwalu ndi ncîina ne nkwèpi kungàalwà kuya mu ifernò, ncyèna mMukwàcila mudimu mu wòwò to. Mèmè ne nsòmbelu wa lulamatu kùdi mukàjàànyì bwalu ndi ncîina ne nkwèpi kwàlwàye kumbènga mu dibàkà, ncyèna bàyèndè mwîmpè menemene to. Kàdi ncyèna muswèku bwà kumutàpa ku mwoyi bwa ní ncinyì ní ncinyì to, bwalu ndi mumunangè.

³⁰⁰ Ki mùdibi kàbidì ne Kilstò, pàdi muntu mulediibwe ku Nyumà wa Nzambi. Kí mbwalu mmwelè mbilà, mwakùle mu myakulu, anyi disaluka kampànda to; kàdi munda mwà mwoyi wèndè, dinanga ndibwelè ne dyangàte kaaba kàà maalu a pa buloba. Ndi nkwàmbila, yèyè mmuMunangè. Ùdi wènda ku luseke Lwèndè, ditùkù dyònsò. Kabyèna bikèngela bwà wèwè kumwambila ne: “Mbibì bwà kwenza *cikampànda*, anyi *cikansanga*, anyi *cikankènga*” to. Yèyè mmumanyè ne mbibì. Nènku, ùdi wènda, yèyè ùdi cintu cilongolola cyà ngàsà mudishikàmìne wa Nzambi. Menemene.

Bwalu kabyèna mwà kwenzekakù to bwa aba bàkaavwà bamana kukenkeshila, . . . bavwijùbwe baabanyanganyi bàà . . . dibiikila dyà ku dyulu . . .

Mpindyewu, tukàadikù beelèèle meeji ne awu ùvwa mmuntu ukàavwa mumana kukenkeshila kàdi mudishinde cyàkabidì, kàdi Bible kèna ùcyàmba mùshindù awu nànsha. “Kakùyi mpatà to kabyèna mwà kwenzeka to bwà muntu,” mùdiye wamba kaaba aka's, “udi mupètè Nyumà Mwîmpè, bwà kudishindayè to.” Mpindyewu cibalàayi kàdi nùsanganè ní kí ncyà bushùwà.

Tàngilàayi apa, àngàtaayi bìdi bifùnda, byònsò mu kaabujimà, ne bidimu, dyumvwija's wè.

301 Mpindyewu ùdi ùbanga kwakula pa, pa cinyi aci? “Tùyaayi kumpàla too ne ku bupwàngàne.” Mpindyewu, mmwambè ne: “Kabiya byà musunya to, ditèèkà dyà bishimikidi kaaba aka pa malongesha ne dibàtiiza ne malongolola, ne bikwàbò. Katwènji aci to. Tùyaayi kumpàla too ne ku bupwàngàne.” Cyena-bwalu cidi *bupwàngàne*, ne bupwàngàne bùdi bùlwila kùdi Kilistò. Ne tudi babwelè mu Kilistò munyi? Ku diya kashàala bàà mu èkèleeziyà anyi? “Ku Nyumà umwe nkutùdi bònsò babàtìijiibwe mu Mubidi wùmwè.” Kaciya: bàbwejamù, ku mwakulu mwakula wùmwè; anyi bàbwejamù, ku dilabulangana dyà ku cianza òmwè; anyi bàbwejamù, ku dibàtìijiibwa dyà mu màyi òmwè to. “Kadi ku Nyumà umwe nkutùdi babàtìijiibwe mu Mubidi wùmwè.” Nudi nucyùmwa anyi? Ki bupwàngàne mbwòbù abu.

302 Ne paùdi ubwela mu Cyòci aci, udi munda mwà Kilistò, ne bwèbè wèwè maalu a pa buloba mmafwe. Ne udi wenda ne Mwànà wa mùkòòkò ditùkù dyònsò, ne makàsà èbè mmalongolola kùdi Nzambi, cyà dyanza. Kaa, matèeta ne dyediibwa dyà ku mateeta ditùdi tupicilamù adi! Wèwè udi wamba ne: “Udi upeta dyediibwa dyà mateeta anyi?” Èyowà's, mukalenge. Ncinyi. . .

303 Ngàsà ncidi Nzambi mwenzè bwànyì mèmè, byenzedi ncìndi mèmè ngenza bwà Nzambi. Mpindyewu, bòbò bàdi bènzelapù dilongesha, bàdi bèèla meeji ne byenzedi ki bìdi bikupetesha dikumbanyina. Byòbi nànkù, kí ndipà dyà kùyi ufuta kantu to. Ngàsà ncidi Nzambi mwenzè bwèbè wèwè: “Ku ngàsà nkunùdi basungidiibwe.” Kadi byenzedi ncyùdi wèwè wenza bwà kwanyisha kwà ngàsà udiYè mukuleejè awu. Nènkù wèwè muMunangè, udi unanga kwenza byenzedi byà Mukalenge. Cyà bushùwà, bwalu, dībà adi, wèwè—wèwè udi muMunangè.

304 Diitaba dyà Meda Broy, bu mukàjàànyì, ncìwà dinanga dyenzè bwèndè yèyè. Cidiye wenza, bwà kuleeja dyanyisha: mmukàji wa musàngèelu, ùshààla kumbèlu, ùkùba bânà, ne mwikàle ne nsòmbelu mwimpè wa lulamatu. Aci kí nnè mbwalu katwèna basèlàngàne to; tudi basèlàngàne. Kadi ùdi wenza aci bwà kuleeja dyanyisha. Yèyè ùya mu ville, ditùkù dyònsò, ne ùkabwela mu makàjiinyi ònsò a bintu byà musinga mupuutula, ne ùbànda ùpweka ne misèèsù, kàyikù musukùle màlòngò, anyi ní ncinyi cikwàbò to, tudi ànu basèlàngàne. Kakùyi mpatà to. Pàngàkenzà mucipù wànyì, aci cyàkakòsa bwalu. Yèyè mmukàjàànyì. Pàcidiku ànu mwoyi munda mwètù, yèyè mmukàjàànyì. Ki wèndè pèndè mucipu. Kadi dyanyisha dyèndè bwà cyòci aci: ùdi ùshààla kumbèlu, ne ùkùba bânà, ne ùteeta bwà kwikala mukàji wa nsongo.

305 Ndi mufwànyine kupàtuka ne kwikala ncìyipù dībà dyònsò, ngenda ànu ndalakana mu ditùngà dijimà, ne mmushiya wamba

kufyototoka ne nzala, anyi ní ncinyi cyònsò, nshiya bânà kabàyi ne cyàkudyà to; tudi ànu basèlàngàne. Bu yèyè mene mwà kumbènga mu dibàkà, ndi ànu musèlàngàne, pàdìbi ànu ne kùdi mwoyi mu mubidi wànyì. Ntu mwenzè mucìpu ne: “Too ne pàatùtápululà lufù.” Ncyà bushùwà. Tucidi ànu basèlàngàne. Kàdi, nànsha nànkù, ndi mulùme wa kameta madimbwa. Yèyè mmufwànyìne kwikala mukàji wa kameta madimbwa. Pa nànkù twètù banangàngàne, tudi tushààla balamàkàne ne twenda tukòka bujitu, bònsò pàmwè.

³⁰⁶ Ki mùdìbi nànkù bwà Nzambi ne Èkèleeziyà Wendè. Paùdì ulediibwa mu Bukalenge bwà Nzambi, neùpetè èbè *mabika* ne *mala*, bulelèlè, kàdi udi ànu mwena Kilsto, udi ànu mulediibwe ku Nyumà wa Nzambi. Bidi mwà kukèngela ne Nzambi àkuumùshè pa buloba kumpàlà kwà dìbà.

. . . kabyèna mwà kwenzekakù to bwà aba bàkaavwà bamana kukenkeshila musangu kampànda, ne balabùle . . . dîpà dyà ku dyulu, . . .

. . . bwà bôbò kudishindakù, bwà kudyàlujulula bôbò biinè cyàkàbìdì ku kanyinganyinga, . . .

³⁰⁷ Mpindyewu, ndi mumanyè kunùdì nwela meeji, nwènu èkèleeziyà. Ngǎnjì nwǎngàcìle ànu cintu cìmwèpelè cyà citàmbekù kukola ndambù, bwà lu—luseke lwà beena ne ànu mikenji alu lùkangiibwè ànu menemene. Tùyaayi mu Ebèlù, nshapità wa 10, ne tütangilàayi cyòcì eci bwà katancì kakesè cyanàànà.

³⁰⁸ Nshapità wa 10, mvensà wa 26.

Bwalu twètù twenza mpèkaatù ku bukole paanyimà pàa . . . twètù bamanè kupeta dimanya dyà bulelèlè, kakwèna kushààla kàbìdì mulàmbù bwà mpèkaatù to,

Kàdi ànu dindila didì dikwàcisha bwòwà . . . dyà cilumbulwidi aci ne ciiji cyà cilakuka kapyà, cyabùtulà mulwishì.

Ewu uvwa upeetula mikenji yà Mòsà uvwa ufwa kakuyi luse to ku bujaadiki bwà bantèmù bàbìdì anyi bàsàtù;

Ambàayi tǔng ne ndinyooka ditàmbe kwikala dikolè dyà mùshindù kaayi, ku dyènu dicinka . . . ne ndikumbànyine, . . . mudyatakàje . . . udi mudyatakàje ku makàsà Mwànà wa Nzambi, ne mubalè mashi a cìpungidi, kùdìye mujidùbwe aku, bu cintu cidi cyà pàtupù, ne . . . mupeetùle too ne midimu yà ngàsà?

³⁰⁹ Mpindyewu wèwè udi wamba ne: “Bishi bwà aci, Mwanèètù Branham? Aci cidi cìmwèka bìshi?”

Mpindyewu, ànu bwà kubala cyanàànà, ndi ndyàmbidila ne: “Mufundù kawèna wàmba aci to.” Aci kacyèna cyàkula bwà

mwena Kilistò to. Aci cidi cyàkula bwà muntu udi mutèèlèje Dìyì kàdi kuDibènga. Nwamònu anyi?

Bwalu twètù twenza mpèkaatù . . . (Mpèkaatù ncinyi? Bupidyà.) . . . twètù tubènga kwitabuuja ku bukole paanyimà pàà bamanè kutùyiisha èvànjeeliyò, kakwèna kùshààla kàbìdì mulàmbù bwà mpèkaatù to,

310 Mpèkaatù ncinyi? Bupidyà. Balàayi Yone Musantu, nshapità mwi4. Yesù wàkamba ne: “Ewu udi kàyi witaabuujà mmumanè kupiishiiibwa.” Mpèkaatù kî nkunwà kwà mfwankà, kunwà kwà maalà, kwenda kwà masandi to. Udi wenza byòbì abi mbwalu udi mwena bupidyà. Abi bidi ànu byambiibwà cyanàànà. Udi wenza byòbì abi mbwalu udi mwena bupidyà. Ànu kulekela dinwà dyà mfwankà, dinwà dyà maalà, ne bikwàbò byà nàнку awu abi, kî mbwena kwamba ne udi—udi mwena Kilistò nànsha. Abi bidi ànu byambiibwà cyanàànà byà dikùdimuna dyèbè dyà mucìma. Kàdi, udi mwà—udi mwà kwenza eci anyi eci, kàdi kùyi ne cyùdi to.

311 Mpindyewu tàngilàayi.

. . . ewu udi ubènga kwitabuuja ku bukole paanyimà pàà yèyè . . .

312 Kî nne—kî nne: “Paanyimà pàà yèyè mumanè kwakidila Kilistò munda mwà mwoyi wèndè” to. Aci kî ncidi Bible wàmba to. Mmwambè ne: “Ewu udi . . .”

. . . twètù twenza mpèkaatù ku bukole, tubènga kwitabuuja ku bukole, paanyimà . . . twètù bamanè kupeta dimanya dyà bulelèlè, . . .

Nwacyũmvù anyi? Kàwva wàmabila mwena Kilistò to, nànsha kakesè.

313 Mukàjì kampànda ùvwa mulwè kùndì, àbìdì aa, wàmba ne: “Mwanèètù Branham, mèmè ndi mwena Kilistò, kàdi ndi mupendè Nyumà Mwímpè.”

314 Mèmè kwamba ne: “Kabyèna mwà kwenzekakù to.” Mwena Kilistò kî mmufwànyineku kupenda Nyumà Mwímpè to. Kwèna mwà kucyènzakù to. Nyumà wa mwena Kilistò ùdi ùfla bujaadiki pàmwè ne Nyumà wa Kilistò. Nwamònu anyi? Ne neùbiikilè, cyònsò cyà Nzambi aci ne: “Ncyà Nzambi.”

315 Kàdi wèwè ne meeji a musunya, newèlulwilè ne neùsekè Nyumà Mwímpè; nànsha wèwè uya mu èkèleziyà munyi, udi ànu ngènzàmpèkàatù, ne udi munkaci mwà kupenda Nyumà Mwímpè. Pàakamònàbo Yesù ùjingulula meeji àbò, bàakamba mùvwàYe “mwena lubùkù.”

316 Yesù wàkamba ne: “Nudi . . . Mèmè ndi nnùfwila luse bwà aci, kàdi piikalà Nyumà Mwímpè mulwè, nwènu bambè díyi dibì Bwèndè Yèyè, kadyàkunùfwidiilwakù luse to.”

Bwalu, bôbò bàakamba ne: “Ûdi ne nyumà wa bukooyà,” bàbìikila Nyumà wa Nzambi ne, “ncintu cyà bukooyà.”

Mwena Kilistò kèna mwà kwenza aci to. Mwena Kilistò misangu yònsò neàbiikilè Nyumà wa Nzambi ànu ne: “Bwakàne.” Nwamònu anyi? Mwena Kilistò kèna mwà kupenda Nyumà Mwîmpè nànsha. Muntu wa pambèlu ngudi upenda Nzambi.

317 Bàvwa biimàne mwaba awu kabàvwa beena Kilistò to. Bàvwa mbatèndeledi, bàvwa mbeena Yudà bàà ku muji, ba-docteurs mu bunzambì, ne bikwàbò, ne bàvwa bàMwelulwila Yèyè ne byenzedi Byèndè, bàbìikila byenzedi byà Nzambi, ne: “Cìvwa nnyumà wa bukooyà ùvwa ubyènza.”

318 Nènkù nudi nwela meeji ne mbûngi kaayi bwà bàdì leelu ewu bàpendà Nyumà Mwîmpè, biikàle ne màpòlomè a D.D.D., Ph.D. mu mènà àbò? Mbûngi kaayi bwà ba-Orthodoxes, beena Kàtòlikè, beena Mishònyì buumàkàne, bàdì bènda mu mìsèèsù ne bèèlulwila mudimu wà Nyumà Mwîmpè, bamanyi bàà mabàlà bàà kapelu, bafinùnuke ànu bu mbòta? Cyà bushùwà. Kàdì bàdì bèèlulwila Nyumà Mwîmpè, ne pa nànkù bàdì bàMupenda’s.

Kàdì mwena Kilistò mulediibwe cyàkàbìdì kèna mwà kwenza nànkù to. Yèyè neàmbe ne: “Awu mmwanèètù. Awu n’Nyumà wa Nzambi udi ne mwoyi.” Ncyà bushùwà. Mwena Kilistò kèna mwà kupenda Nyumà Mwîmpè to.

319 Ngènzàmpèkààtù ngudi upenda Nyumà Mwîmpè; mwena bupidyà, *ngènzàmpèkààtù*, “mwena bupidyà.” Kùdì bintu ànu bìbìdì: anyi wèwè udi mwena kwitabuujà, anyi udi mwena bupidyà.

320 Mpindyewu, mònaayi apa nùnkù, bwà kwenzakù ne tûtwe cìshìndaayi ku cyôcì eci mpindyewu. Mvwa mupetè cikèènà-kumòna cìvwa misangu yònsò ànu cintàcisha. Kùkaadi bidimu kùmvwà ntàngila cyôcì aci. Mvwa ngamba ne: “Kaa, muntu yèyè ànu mupetè Nyumà Mwîmpè dìbà adi, ne pashìshe mutwè cìmpìngà, mmufwànyine kujìmina kashidi.” Ncìvwakù mwà kwenza ne cikwàbò eci cyùmvwikè cyà meeji pàmwe naaci to.

321 Mèmè kwamba ne: “Kàdì mbwà cinyi Bible mmwambè, ne: ‘Ewu udi utèeleja Méyì Àànyì ne wìtabuuja Yèyè ùdì muNtùme ùdì ne Mwoyi wà Cyendèlèèlè, wà Cyendèlèèlè, ne yèyè kààkupìcilakù ku cilumbulwidi to, kàdì mmumùke ku lufù muyè ku Mwoyi. Bònsò bàdì Taatù muMpèeshe nebàlwe kùNdì, ne nànsha umwe wa kùdìbò kì mmujìmine to, Mèmè nèmmbubiishè ku lufù ku matùkù a ndekeelu. Muntu nànsha umwe kèna mwà kubàNnyènga ku cyanza Cyànyì?’ Aci cidì cipetangana ne eci bìshi? Ncìvwa ànu mwà kucyùmvwakù to. ‘Kabyènakù mwà kwenzeka to bwà aba bàkaavwà bamana kukenkeshila.’” Mvwa ndyàm̀bidila ne: “Kùdì cintu cipampàlà̀m̀uke. Ncyènà ànu mwà kucyùmvwà to.”

Ki mêmè kuya ku kaadisangisha kakesè kàà beena Mpenta, kùkaadi bidimu.

³²² Kí nkushààle muntu nànsha umwe mu èkèleeziyà emu to, ngeela meeji, dilòòlò edi, udi muvùlùke. Kùkaadi bidimu, eci civwa mene ànu lwà pa cikondo civwà tabernacle ewu mwibàkiibwe. Ambà ànu ne, ncifwànyine kwikala Mwanèètù Graham udi paanyimà pààpa wàwa, anyi muntu kampànda. Ncyèna mumanyè to, nukààvwapù, anyi to, nwènu bânà bèètù. Mwanèètù Mahoney, ngeela meeji, ùvwapù. Èyowà. Pabwìpì menemene ne mêmè kusèlangana.

³²³ Dipà adi dèkwàta mudimu, mvwa nciina's. Bàvwa bàngambila ne mbyà dyabùlù. Ncivwa mumanyè to too ne pàakalwà Mwanjèlò wa Mukalenge kungambila.

³²⁴ Mêmè kuya ku Mishawaka, ne kusòmba mu disangisha adi, kàdi kacya ncivwakù mwanjì kuumvwa mbilà ne myadi ne ditùmbisha dyà Nzambi búngì nàka to. Mêmè kudyàmbidila ne: “Mwanèètù, eci's n'Dyulu's.” Ne, kaa, mùshindù wùvwàbo bàya muulu bààlukila's.

³²⁵ Byàkakèngela bwà kwenzelabò disangisha adi mu Nord, bwà mùvwàku ditàpulujiangana dyà makòbà. Bafùike ne batòòke bàvwa badisangè. Beena P.A. bàà W. ne beena P.A. bàà J.C. bàvwa bushùvwà badisangè ne balwè beena Pentecôte Unie. Kàdi ditàbuluja kaayi divwàbo bènza, ku tabernacle wa Mwanèètù Rowe ku Mishawaka kwàka's wè. Nènku mêmè, nsongààlume wa citende wa ùzùka bwà kumanya, musòmbèle mu nkwasà wa paanyimà, mvwa mbandila byònsò ebi. Kacya ncivwakù mwanjì kumòna bintu abi kumpàla to.

³²⁶ Kùvwa muntu musòmbèle lwà apa... Ncítukù mwanjì kulonda bwalu ebu kwònsò eku bantu bitwilàngàne to. Kùvwa muntu musòmbè ku luseke, ne muntu ku lukwàbò luseke, ne umwe ùvwa wàkula mu myakulu, ne mukwàbò ùyàndamuna. Nènku bàvwa bàmba bintu bishiilèshìilàngàne bìvwà ne cyà kwenzeka. Pashiishe, *ewu* nùnkù wàkula mu myakulu, ne *wàwa* nàka wàndamuna. Mêmè kudyàmbidila ne: “Ekèlekèle, byàbya's mbilenga be!” Mêmè kudyàmbidila ne: “Butùmbì kaayi! Bàba's bàdi ne cyà kwikala Banjèlò, batùlùke pànwapa mu mmwènekelu wa bantu.”

³²⁷ Èè, mvwa ànu ne ndola umwe ne meeyà makùmì mwandamutekètè ne àtaanu, bwà kwalukila kumbèlu, ne mvwa—mvwa—mvwa mwà kupeta ànu ntankì umwe wa kàsòloonyi. Mêmè kuya kalààla mu budimi bwà matalà bufùku abu. Ndi mulondè citùpà cyà bwalu ebu mu mukàndà, kàdi kí mbwònsò to, bwalu ncivwa muswè kubàtapa ku mwoyi to. Kì pa nànkù, dilòòlò adi, kwambabò ne: “Bayiishi bònsò lwàyi ku cibùmbà cyà ku cyambilu eku.” Mvwa pa cibùmbà cyà ku cyambilu apu. Mvwa mwambi wa mwànà ku bònsò mwab'awu dîbà adi.

328 Pa nànkù, pààkacyàbu mu dindà, kundòmbabò bwà mèmè kuya kayiisha. Mèmè kusokoma. Nudi bamanyè's, muntu wa bafiike awu kwambayè ne: "Nyèyè ewu." Nudi bavùlùke bwalu-bulonda abu, pààkangeelàye patòòke pâmvwà musòmbe mwab'awu apu.

329 Ki paanyimà pàà mèmè mumanè kuyiisha ditùku adi, ngenda ngendakana, mèmè kudyàmbidila ne: "Ngikalakù mwà kupeta bantu bàbidì abu's wè." Bòbò mbàvwà bàlombolà disangisha. Umwe ùvwa ùjuuka ùshààla kwìsù kutòòke tòò; ùvwa wàkula mu myakulu. Ne mukwàbò ùvwa ùyàndamuna, ne ùfila mèyì ne: "EMU MMUDÌ MUKALENGE WÀMBA: 'Kùdì muntu *kampànda* mwab'ewu, dìnà dyèndè n'*kampànda*, bìvwà bikèngela bwà kwenzayè *cikanpànda* ne *cikansanga*.'" Mwanèètù, cìvwa bulelèla's. Ne mukwàbò awu ùvwa ùjuuka ne wàkula mu myakulu, ne ùvwa ùyàndamuna.

330 Mèmè kudyàmbidila ne: "Kaa, ekèlekèle, ebi's mbilenga be!" Pa nànkù, ditùku adi, mèmè kwela meeji, mèmè kupàtuka kuya kasambila. Kudyàmbidila ne: "Mukalenge, ngenzèlèku aci cyàkàbidì." Ncìvwa mumanyè ne ncyà dibìikila bìshi ciinè aci to, bìkèèna-kumòna's.

331 Mèmè kupàtuka kuya kasambila, ne kulòmba Mukalenge bwà kunkwàcisha. Mèmè kuya kumfundu kwà citanda aci, ne kwenzekabì ne ntwilanganè ne umwe wa kùdibo. Mpindyewu, Mukalenge ùtu mumpèesha mùshindù wà kumanya bintu. Mèmè kumulabula ku cyanza. Kwamba ne: "Wetwàwu!"

Yèyè ne: "Wetwàwu! Dyèbè nganyì?"

Mèmè ne: "Branham."

"Kaa," mwàkambàye, "nsongàlùmè wa citende wàyiishì mu dindà emu ùvwa awu ngwèwè."

Mèmè ne: "Èyowà's, mukalenge."

332 Pàncìmvwà ànu ngenza nendè muyiiki apu, mèmè kubàkula nyumà wendè. Ne yèyè mwinè ùvwa mwena Kilistò mulelèlè, mwena Kilistò ànu wa mukezùke ewu, mwanèètù. Ndi nnwàmbila ne, ùvwa mwena kwitabuuja. Mèmè kudyàmbidila ne: "Kaa, ebi's mbilenga be!"

333 Ne bu dîbà dijimà nànkù kuumukila apu, mwab'awu pabwîpì ne kàshinyì, kàvwà katàngilàngàne ne kàshinyì kanène menemene, kàvwà paanyimà pààkù apu pafùnda ne "Yesù Nkàâyèndè," ki mukwàbò muntu awu nyèyè wàwa mwimanepù. Ki mèmè kuyapù ne kwamba ne: "Wetwàwu, mukalenge!"

334 Yèyè ne: "Wetwàwu!" Yèyè ne: "Wèwè udi Mwanèètù Branham, wakùlù mu dindà emu awu."

335 Mèmè ne: "Èyowà's, mukalenge. Mmèmè." Mèmè ne: "Twàmbè ne, mapà manène a Nzambì àdì àkwàta mudimu mu nwènù bàna bèètù bàbidì awu àdì ànsànkisha be."

336 Yèyè ne: “Twasàkidila, Mukalenge Branham.” Ki mèmè kubanga kuumvwa nyumà wendè. Cìkèèná-kumòna kulwaci. Ní nkààdikù mwakùle ne mwena lubombo, kàdi ki umwe wa kùdìbo wàwa. Mukàjèndè ùvwa mukàjì wa nsukì mifiike. Ùvwa musòmbe ne mukàjì wa nsukì mitòòkòlòke, mulelè nendè bânà bàbìdì. Yèyè kàvwakù mwena Kilistò mu kantu nànsha kàmwè to.

337 Dìbà adi mèmè ne: “Ndi mukadyèlè mu binganyi’s? Pàanyi’s ngeela meeji ne mvwa munkaci mwà Banjèlo, kàdi mpindyewu’s ndi ne cyà kwikala munkaci mwà baadémons. Kùdi cintu cyenzèke. Mukwàbò’s nyewu uvwa apa, mwena Kilistò mushùwashùwàlè; ne Nyumà umwèumwè uvwa utùùlukila ewu muntu awu, nguvwa utùùlukila ewu muntu.” Mèmè ne: “Mpindyewu’s ndi mu cibwejàkàjì cyà menemene.” Ki mèmè kupanga cyà dyenza’s. Mèmè kudila, nsengeleela Mukalenge. Ncìvwa ne cìmvwà mwà kwitaba to.

338 Bàkaavwa ànu pabwìpì ne kumfikisha ku. . .Kunkonkayè ní nkààvwakù mupetè Nyumà Mwimpè, mulùmyànà ewu ùnkonka’s, ki mèmè kwamba ne: “To, mukalenge, kì mmu mùshindù unùdì nwènù baMupetè emu to.”

Yèyè ne: “Kacya ukààdikù mwakùle mu myakulu anyi?”

Mèmè ne: “To, mukalenge.”

Yèyè ne: “Nàнку kwèna muMupetè to.”

339 Ki mèmè ne: “Pàmwàpa udi mubingè’s, mwanèètù wanyi. Pàmwàpa ncyèna muMupetè to, bwalu ncyèna ne cinùdì nwènù naaci aci to.” Ki paanyimà pàà katanci, mèmè kudyùmvwa ne disànka mùmvwà ncìyì naaci to.

340 Ki pashiishe mèmè kutàngila aci, ne kumòna mùvwàci cìkwàta mudimu.

341 Pa nànkù, dǐngà ditùku, mvwa muyè kasambila kuntweku, kùkaadi ntàntà mule. Ndi nkwàmbila ne mbwà cinyì, mwinè ùmvwà nsambidila awu, ùvwa n’Roy Davis. Nènku mvwa muyè kasambila kuntweku, bwalu yèyè ùvwa mumbiikile mùndì “muntu wa bènzeja maalu,” ne mvwa ndòmba bwà Nzambì àmfuwilè luse bwà bwalu abu. Ne yèyè ùvwa ne nzùbù wa byamù byà difùnda mikàndà kuntwaku, mufunde cibèjibeji. Ki nzùbù wa byamù byà difùnda mikàndà awu kukwàtayè mudilu ne kwoshikayè kubùtuka, malòòlò àbìdì paanyimà pàà cyòci aci, pàvwàbo munkaci mwà kukwàtamù mudimu.

342 Nènku mvwa mwimàne paanyimà apu mu nyòngòlò wa kale paanyimà pàà Green’s Mill apu. Mèmè kupàtuka kuyamù. Nènku mvwa munkaci mwà kusambila, nkààvwa muntwamu, matùku àbìdì. Mèmè kutèeka Bible wanyi pa citùpà cyà mucì cyà kale, mwab’awu, mvwa mupàleejè Mwanèètù Wood, abìdì aa, kutèekapù Bible wanyi awu. Mèmè kusòmba cibelu eku cibelu eku pa citùpà cyà mucì aci. Ki lupeepèle kutuutalù.

Mémè kudyàmbidila ne: “Ngénjì ntàntà mule be, mu nyòngòlò mwàmwa, ngánjì mbalèku ndambu.” Ki mémè kwambula Bible awu ne kubanga kubala, ne pa nshapità ewu mpàvwàye mubuulùlùkile. Èè, mémè kubanga kubala, ki mémè kubanga kudìkonka dìbà adi. Nwamònu anyì?

Bwalu kabyèna mwà kwenzekakù to bwà aba bàkaavwà bamana kukenkeshila musangu kampànda, . . . bavwìjùbwe baabanyanganyi bàà Nyumà Mwìmpè,

. . . balabùle dîyì dîmpè dyà Nzambi, ne . . . cikondo cìcìlwalwà,

Bòbò badìshìnde, bwà kudyàlujululabò bòbò biinè. . . ku kanyinganyinga; pa kumòna ne bàdi bàpoopela cyàkàbìdì bwàbò bòbò Mwànà wa Nzambi ku nkùrusè, ne bàmufwìsha bundù bwà patòòke.

343 Mémè kudyàmbidila ne: “Mufundu awu ngwòwò awu.” Kàdi cintu kampànda cìvwa ànu cingìimàne pa mwoyi. Dìbà adi mémè kubanga kudyàmbidila ne: “S’ki mwaba wùvwàye mwambè ewu, ku cibangidilu ne: ‘Katùyì tutèèka bishìmikidi bifwè byà kanyinganyinga, ku cibangidilu. Katùyì tutèèka bishìmikidi byà kanyinganyinga,’ ne apa ùdi wàmba ne: ‘Bàdyàlujulula bòbò biinè ku kanyinganyinga. Kàdi tuyaayi kumpàla too ne ku bupwàngàne, tushìya bintu ebi paanyimà.’” Pashìishè mémè kubanga kubala. Pashìishe mémè kubala mvensà uvwa ulonda.

Bwalu buloba bùdì bìnwa mvùla utu ulòkapù misangu yàbùngì abu, ne bùtòlwesha bisèkiseki bwà aba bàdìbo babwàkàjìle, bùdì bupeta mabènesha a kùdì Nzambi,

Kadi ebu bùdì bùtòlweshà mèbà ne mingòngà mbwèngìbwe, ne bùdì pabwìpì ne kwediibwa mulawu, bwòbù bùdì ku ndekeelu ne cyà kwoshìibwa.

344 Nènku pàngàakabalà aci, Cintu kampànda kunnyùkushaci. Ki mémè kudyàmbidila ne: “Mukalenge, aci kí ncitàngile Roy Davis to. Udi mufwànyìne kwenza nàнку bwà cinyì?”

345 Mémè kubanga, kubuulula dikwàbò dibèji. Bìvwa bìkèngela ngàalukilèku, cyàkàbìdì ne: “Kabyèna mwà kwenzekakù to bwà aba bàkaadi musangu kampànda bamana kukenkeshila,” mémè ku Cìbalululula’s.

346 Dìbà adi mémè kudyàmbidila ne: “Mukalenge, eci ncinyì? Udi muswè kwamba cinyì, Mukalenge?”

347 Ki mémè kukùdimuka e kwalukila mu nyòngòlò wanyì amu, bwà kusambila bwa Cyòci aci. Ne pàngénjì nàнку, mémè kumòna buloba bùyùnguluka. Ne bývwa busekuna bwònsò, bilenga byà dikèma, buloba bujimà abu. Ki mémè kumòna muntu muvwàle bilàmbà bitòòke, wènda ùnyùnguluka, mwikàle ne mufuku mu cyanza. Úvwa ùnyamina mamiinu pàvwàye wènda ùnyùnguluka apu. Úvwa wènda ùyùnguluka wènda

ùlonda mfùdiilu wa buloba. Nènku mmwenzè ànu ùjikija dinyunguluka adi, ki mulumyànà kampànda kulwa muvwàle bilàmbà bifìke fitùtùù, muntu wa mmwènekeli wa budimù, ùdìfinda mùshindù ewu, ùkènzakana. Ne ùvwa ne dimiinu kampànda. Ne ùvwa wènda ùkùpa cintu kampànda paanyimà pààci, pàvwàye wènda ùnyunguluka buloba apu; ùbandila bantu bònso ne wènda ùkùpa. Mémè mvwa mwimàne ntàngila cikèènà-kumòna aci.

³⁴⁸ Paanyimà pàà yéyè mumanè kuya, buloba kunyungulukabù, ne kùvwa byà pa madimi binène, binène menemene, ne bìvwa byà blé. Nènku kùvwa bisoosà bibì, mpoopu ne bikwàbò mu blé amu.

³⁴⁹ Kulwakù munanga. Nènku, kaa, mùshindù mwinè wùvwà blé mukèsè awu mulembèlèje mutù wèndè mukèsè awu, mwikàle ne nyòòtà yà màyi. Mpoopu mukèsè awu ùvwa ne mutù mulembeleja, ne ùvwa ne nyòòtà yà màyi. Bantu bònso bàvwa bàsambila bwà mvùla. Ki paanyimà pàà cikondo, kulwakù divuba dinène ne kumyaminadi ànu màyi pa buloba bujimà. Ki mpoopu mukèsè awu kutùpikayè, kubanga kwela mbilà ne: “Butùmbi kùdì Nzambi! Àlèluuyàh! Mukalenge àtumbè!”

³⁵⁰ Nènku blé mukèsè awu, kutupikayè, kubangayè kwela mbilà ne: “Butùmbi kùdì Nzambi! Mukalenge àtumbè!”

³⁵¹ Ki pashìshe Mufundu awu kundwilawù, wùdì wùsanganyibwà mu Mukàndà wà Maatàayi, nshapìtá mwi5 ku mvnsà wa 45 awu. Nènku tèelejàayi cidì Yesù mwambè, mu Maatàayi 5.45. Nènku tèelejàayi ne ntèmà yònsò mpindyewu patùdì tubala apa. Maatàayi, nshapìtá mwi5 ku mvnsà wa 45, wa 46; wa 44, bwa kubangilakù.

Kadi Mémè ndi nzwàmbila ne: Nùnangè beena lukunà bèènù, nùbeneshè aba bàdì bànwèla milawu, nwenzelè aba bàdì bànùkìna bìmpè, ne nùsambidilè aba bàdì bànupeetulà, ne bàdì bànùkèngeshà;

Bwà nwènù nùmonè mwà kwikala . . . kubìkidiibwa . . .nwènù nùmonè mwà kwikala bàndà bàà Taatù wenù udi mu dyulu: bwalu yéyè ùtu ùbàndisha díbà dyèndè pa . . .babi ne pa . . .bìmpè, ne ùtu ùtùma mvùla pa baakàne ne . . .babi.

³⁵² Pa nànkù, nudi numòna's, mvùla umwèumwè udi utòlwesha blé awu, ngudi utòlwesha mpoopu. Nènku, ki díbà adi, mémè kumòna cimfwànyì aci. S'ki mujikudi webè wa musunya nyéyè awu, udi ànu mu èkèlezìyà awu. Kàdì mamuma èndè . . .Yéyè mmufwànyìne kwela mbilà, kutùpika, kujà maja, kwakula mu myakulu; kàdì mamuma èndè's: yéyè mmpoopu. Ne ki mukwàbò nyéyè awu, mwikàle ne Nyumà umwèumwè awu. Nyumà Mwìmpè ùdì mwà kutùuluka buludì mu musumbà wà bantu, ne mwena lubombo ùdì mwà kwela mbilà, ku Nyumà Mwìmpè, ànu mùshindù wùmwèumwè wùdì mpoopu mwà kwikala ne mwoyi ku mvùla udi mutùmibwe awu. Ki cidì Pòlò wàmba kaaba

aka ncyôci aci. Kàdi kabyèna mwà kwenzekakù bwà mpoopu kulwayè blé to, anyi blé ùlwa mpoopu to. Nwacyümvù anyi? [Disangisha dìdi dyàmba ne: “Amen.”—Muf.]

Bwalu kabyèna mwà kwenzekakù to bwà aba bàkaavwà musangu kampànda bamana kukenkeshila, ne bàkaadi . . . baabanyanganyi bàà dipà dyà Nyumà Mwimpè,

Ne . . . *balabùle dîyi dîmpè dyà Nzambi, ne bukòlè bwà cikondo cìcilwalwà,*

. . . *bwà badishinde, bwà kudyàlujululabò bôbò biine cyàkàbidì . . .*

Tèelejàayi cìdiye mwambè.

. . . *bwalu mvùla . . . ulwa misangu yàbúngi pa buloba, bwà kubùmyamina màyi ne kubwàkaja pànwapa, ne kubùlongolola;*

Kàdi . . . bidì biikàle mèbà ne mingònga bidì pabwípi ne kubèngiibwa: . . .

Mpindyewu, *ki bwà cinyi tushiya maalu a ku cibangidilu a malongesha a Kilistò, tuyaayi . . . too ne ku bupwàngàne; katùyi cyàkàbidì tutèeka bishimikidi byà kanyinganyinga ne midimu mifwè . . . kùdi Nzambi, ne diitabuuja, ne bikwàbò,*

. . . *ne malongesha a mabàtiiza, . . . ditentekelangana dyà byanza, ne bikwàbò; . . .*

³⁵³ Nwamònu’s, mwena kwitabuuja wa musunya, wa mu matùkù awu, ànu mùdìbi leelù ewu emu, mmuswè kwikala kwamba ne: “Èè, ndi wa mu èkèleeziyà. Nkàadi mumanè kunyingalala. Mwà—mwà mujuukè, mwenzè dijìkula. Nkàadi mubàtìjìibwe.” Nwamònu’s, bàdi bèeyemena malongolola a musunya awu. Kàdi bidì byènza cinyi? Bidì bitwàla mpoopu.

³⁵⁴ Bupwàngàne bùdi bwènza cinyi? M’blé. Blé n’Dìyi dyà Nzambi. Ùdi ùkwàta nendè mudimu bu Dìyi Dyèndè. Ùdi Dimiinu Dyèndè. Ùdi ùvulangana.

³⁵⁵ Mbilondèshìle ku dimiinu dìdi dimyaminyiibwe mu mwoyi wèbè. Wèwè ulwa mu èkèleeziyà ànu bwalu udi uciina bwà kuya mu ifernò, wèwè ukashààla wa mu èkèleeziyà kampànda bwalu kwèna muswè—kwèna muswè kuya mu ifernò, wèwè ucìdi ànu mpoopu. Wèwè—wèwè ukashààla wa mu èkèleeziyà ànu bwà kwikala mumanyike, wèwè ucìdi ànu mpoopu. Wèwè mwenzè bintu byònsò byà mmwènèkelu wa kwisùkwisù bidì bìkèngelà kwenza ebi, ne ki byònsò byùdi pèèbè mwenzè, wèwè ucìdi ànu mpoopu.

³⁵⁶ Kàdi mwena Kilistò mulelèlè ne mushùwashùwàle, ùdi ùkolesha muntàngile ku bupwàngàne too ne mùdi maalu a pa buloba àfwa ne wèwè ulwa cifùkiibwà cipyacipyà mu Kilistò

Yesù. Dìbà adi, kabyèna mwà kwenzekakù to bwà muntu awu kudishindayè. Kì cìdì Bible mwambè! Nudi numòna mùdì aci cìkùmbanangana ne Mifùndù mikwàbò anyì? Nudi numòna mùdìWu wùcìtèèka mwaba awu mene pa kaaba kààcì amu anyì?

357 Mmuniyì mùdìWu mwà kwamba apa ne: “Muntu ukààdi musungìdiibwe kèna mwà kujìminakù to” kàdi kulwa apa kwamba ne: “Kàdi, wèwè mujìmine, anyì mupendè Nzambì, kabyèna mwà kwenzekakù”? Bushùwà, pawìkalà mupendi wa Nzambì, kwèna mwena Kilistò to.

358 “Muntu nànsha umwe, wàkula ku Nyumà wa Nzambì, kèna ùbìikila Yesù ne mmwedìibwe mulawu to.” Yone Munsantu 4. . . anyì Yone wa Kumpàla 4. Muntu nànsha umwe wàkula ku Nyumà wa Kilistò kèna ùbìikila Yesù ne m’“mwedìibwe mulawu” to. Nyumà yònsò, wa Nzambì, udi mu Èkèleeziyà wa beena Kilistò, ùdi wìtabangana ku mèyì ne byònsò bìdì Nzambì mwambè.

359 Tudi tubala apa ne: “Yèyè wàkatàpiibwa mpùtà bwà kushipa kwètù kwà mikenji. Ku mibùndàbùndà Yèndè tudi bòndòpiibwe.”

360 Meeji a kale a musunya àdi àmba ne: “Matùkù a bishimà àkaadi mapìte. Mèmè ndi *Docteur Jones*.” Nwamònu anyì? “Cintu pààcì ne ndyondopa dyà kùdì Nzambì kacýènakù to. Cintu pààcì ne nntèndeleeleu wa mu ndòndò wa mwoyi kacýènakù to. Nwènu’s nudi ànu musumbà wà bantu babìndùlùke. Nudi nusalukangana nàka. Nwamònu’s, kì cyònsò cìdìku. Kakwèna bwà nsongo to. Twètù tudi ba-Presbytériens. Tudi ba-Luthériens,” anyì nì ncinyì cyònsò cìdìku. “Tudi bamanyè patùdì biimànyine.”

361 Kàdi ncinyì cìdì Nyumà wa Nzambì wàmba? Yesù Kilistò, umwèumwè awu kaaba aka! “Amen,” mùdì Nyumà wa Nzambì wàmba. Yèyè ùdi wìtabangana ne Dìyì lùkàsà. Èyowà’s, mukalenge. Ùdi mwaba awu mene. Nudi bumvwè cìdì njinga kwamba aci mpindyewu anyì?

362 “Malongolola a musunya aa àdi àtwàla lufù,” mùdì Pòlò mwambè.

363 Kàdi mwaba wùdì Mwoyi mulwè, bupwàngàne ebu: “Ewu udi utèeleja Mèyì Aanyi, wìtabuuja Yèyè udi muNtùme, ùdi ne Mwoyi wà kashidi, ne kààdyàkupìcilakù ku dipiìla to, kàdi mmuumùke ku lufù muyè ku Mwoyi. Mèmè nèmmpupèèshè Mwoyi wà kashidi, mmubiìshè ku lufù mu matùkù a ndekeelu. Bònsò bàdì Taatù muMpèèshe nebàlwe kùNdi, ne nànsha umwe wa kùdìbo kì mmujìmine to.” Kèna mwà kujìmina to.

364 Pa nàнку, cìdìcì cyèenza—cìdìcì cyèenza ncyeci. Bantu bàdì bèèla meeji ne aci cìdì cìpèèshangana kalèngù. Mwanèètù, kwèna ukwàcila Nzambì mudimu nyòka mukwimànyine mubiìpishe kwìsù nànsha. Nzambì kì ng’umwe wa ku bantu bàdì ne mfimbù wa nyòka mufìike aba, ùkutùma eku ne eku

to. Yèyè n’Taatù. Ùdi Dinanga. Nzambì ùdi Dinanga. Ne Bible mmwambè, mu Yone Munsantu ne: “Ewu udi unanga ngwa kwà Nzambi.”

³⁶⁵ Wèwè udi unanga Nzambì. Ncyèna mufwànyine kwikala nàнку to, bu mèmè mwà kuya—kuya kanwà maalà dilòlò edi. Ncítukù mwanjì kunwà maalà to, kacýà bàndela. Kàdi bu mèmè mwà kuya kanwà maalà, ncyèna mufwànyine kwikala ne bwôwà bwà kwediibwa mfimbù to. Kí ng’aci cìndì mbèngela kuya—kuya, ncìyi nya kaànwà to. Cìndì ncìyi nnwìna, mbwalu ndi muMunangè. Yèyè mmunnangè. Kí ncyenzi cyà mikenji nànsha. Kí ncintu cìdi cikèngela ne ànu mèmè mwenzè to. Mbwalu Yèyè ùkaadi mumanè kwenza cintu kampàndà bwànyì mèmè, ne mèmè ndi muMunangè bwà bwalu abu. Ki bwalu mbwabù’s.

³⁶⁶ Pa nàнку, mwikàle ne Nyuma awu munda amu, utu mulayìibwe ne: “Mèmè nèmmupèèshè Mwoyi wà kashidi, ne yèyè kàakubùtukakù to.” M’Mushimè anyì m’Mwambè Bulelèlà? M’Mwambè Bulèlèlà. Pa nàнку, nudi numòna mùdi Eci cyùmvwija anyì? Dibènga-kwenzeka dìdi bwà muntu ùdìshìnda pàànyimà pàà mumanè kupeta ngàsà. Kèna mwà kudìshìndakù to. Ùdi mwà kudìshìnda, cyà bushùwà, kàdi kàyi wàlukila ku byà kanyinganyinga, wàlukila ku dyenza cyàkabìdì dyà byenzi byà kale abi to.

³⁶⁷ Pa nàнку, nwènu bònsò bàdi bàtuutà miseesu nuumuka ku ditàbuluja nuya ku dikwàbo, ku mwaba ne pashìshe kuya ku mukwàbò abu, kanwènaayikù numòna ne kanwèna biimanyika, kanùyì bashìndàmija kaaba kàmwè anyì? Mpindyewu, bushùwà ne, wèwè udi wamba ne: “Mwanèètù Branham, ncyèna mumanýè ní...” mbushùwà ne Nzambì kí mmufwànyine kumpèèsha mudimu wà bwambi wùdiYe mumpèèshe ewu, kàdi kundekela nshààla mu dipanga nànsha. Ne bu ne kawùvwa mujaadika kùdi Mifundu to, dìbà adi ncifwànyine kwikala dipanga, kàdi Mifundu’s *nyeyi* bwà kucìtwa nyama ku mikòlò. Kacya Èkèleeziyà kàtukù mwanjì kupangila kaaba to.

³⁶⁸ Bantu bàdi bàya, bàkadìvwija bàà mu èkèleeziyà, bàkòkangana, bàlwangana mvità, bàbìnduluka, ne—ne bikwàbò byònsò, ne biikàle ne nsòmbelu wa musunya wa mùshìndù kanà wònsò ne: “Kaa, èyowà, mèmè’s ndi mwena Kilistò.”

³⁶⁹ Mwua muumvwè dijìkula leelù ewu dyà inàbànza mutekète uvwa ungambila ne bàyendè ùvwa wènda masandi ne muntu mulùme kampànda. Mmubàjìkidilèjìkidile, mu mwaba ne mu mwaba. Kàdi mukàjì ùdi wamba ne: “Ndi nkwambila ne: ‘Mèmè ndi mwena Kilistò.’” Um-hum.

³⁷⁰ Tàngilàayi ànu Jimmy Osborne ewu, mwab’ewu ùyiisha mu dyàlumingu mu dìndà; cibì mu mijiki yà dizùnzuka, bìdùndadùnda ne byònsò abi, mu lumingu lujimà.

371 Tàngilàayi Elvis Presley, mukwàbò Yudaàsà Mpongoloki wa mu cidimu cyà 1947, ùya ùkashààla wa mu Assemblées de Dieu, mwena Mpenta, wàkula mu myakulu bwà Nyumà Mwímpè, kàdi mmutùme misùùkà mu mwaba wà dikèngeshiibwa kutàmba ngàndà yònsò yà maalà a kapyà yikaadiku munda mwà bidimu makùmi àtaanu bishààle ebi eyi. Mmunyangàkàje meeji a bansongà bàà bitende pa buloba bujimà, mu mùshindù wà nsòngàkàji yà bitende yifika ku dikòpola tùpùtulù twabò twà mwinsì bätwimansha pa cibumbà apu, bwà yèyè kwelayèpu cyàlà. Byà ciipanshì menemene mu mùshindù wà kabàyikù mwà kuswà kumuleeja ku télévision to, kuumukila mu cifùka too ne kwinsì, mùshindù wùdi wèndè mubidi's. Nyumà Mwímpè, dyakula dyà mu myakulu, n'á nì ncileeji? Kaa, mwanèètù, bu Nyumà Mwímpè mwikàlepù, Kàvwa mufwànyine kwenza maalu mùshindù wàwa to. Nwènù's nudi bamanyè kutàmba byà abi. Nànshà kakesè. Nzambi mmunangè disukudiibwa ne bukezùke ne cijila.

372 Ncyèna ngenza maalu a disukudiibwa ne bukezùkè ne cijila bwà kudivwija mwena Kilistò to. Kàdi Kilistò, munda mwànyì, ngudi ne nsòmbelu wa byòbì abi. Ne mèmè ndi muMunangè. Ne mèmè mwenzè cintu kampànda cibì, cidi cimpùisha. Ànu mwaba awu nèngàmbè ne: “Nzambi, mfwilèku luse.” Ditùkù dyònsò, bikèngela ngùikalè ndòmba luse, ditùkù dyònsò. Ne wèwè pèèbè, ki cyùtù ne cyà kwenza. Ncyà bushùwà ne, ncyùtù ne cyà kwenza.

373 Kàdi mpindyewu wèwè mwikàle—wèwè mwikàle wa musunya, udi ushàadila ànu paanyimà, wamba ne: “Àà, èè, mbimpè's, mèmè's ndi wa mu èkèleeziyà.” Nwamònu anyi? Nènku dîbà adi, paùdi upenda Nzambi, apu mpaùdi kùyi ne Diitabuuja dyàkapèèshiibwà bansantu musangu wùmwe cyendèlèlè. Dîbà adi udi welulwila Cyòci aci, ne uCibìikila ne: “Nyumà mubi.” Wamba ne: “Mmusumbà wà bansantu babùnguluki bàà mu malaba.” Dîbà adi, udi uditàpulula nkààyeebè pankaci pàà ngàsà ne cilumbulwidi, dîbà adi bwèbè mbutùùke kashidi.

374 Yesù wàkamba ne: “Diyì dibì dimwèpelè diCyàmba, kadyàkufwidiiwakù luse to mu cikondo eci anyi mu cikondo cìcìlwalwà.” Kàdi mwena Kilisto, mulela kùdi Nyumà, kèna mwà kwakula bibì bwà Cyòci aci to, bwalu kaciyèna mwà kwenza nàнку to. Cidi ciitabangana naaCì. Ncyà bushùwà.

375 Ki bwà cinyì bantu bàtu bàteeta kungambila ne, Dikunji dyà Kapyà dyàdya, didì dimwènèka kaaba aka munkaci mwètù adi, bàtu bàteeta kwamba, ne: “Aci cìvwa ndyabùlù,” ne, “Cìvwa ànu bwalu bufwikakaja cyanààna,” byònsò ebi. Kàdi cyamù cyà fòtò's ncijaadike ne kaCìvwa aci. Ne byenzedi bìdi bisanganyibwa ànu mu Bible menemene, Dikunji dyà Kapyà dimwèdimwè dyàkatwilanganà ne Pòlò mu njila wa ku Damàsèkè adi. Bintu byònsò bìdiYe mwenzè kuntu kwàka ebi,

s'nyewù ùbyènza mùshindù ànu wùm wèwùm wè awu menemene, ku Bible. N'Kilistò, Mwànà wa Nzambi.

³⁷⁶ Nènku patùdi tulediibwa cyàkàbìdì, tudi ne Mwoyi wà kashidi, ne katwènakù mwà kubùtukà nànsha. Kí mbifwànyìnekù kwenzeka to bwà muntu kudishìndayè. Aci ncìdì Bible mwambè.

³⁷⁷ Mpindyewu, tèelejààyi, tàngilààyi cìdì Pòlò wàmba. Nèmbalè bìdì bishààle, bwà kumòna ní cyòci aci kacýèna cyùm v wika cijaalàme, mpindyewu. Twánjààyi kutùngunuka, katanci kakesè pàtupù. Mvensà wa 8.

Kàdi ebu bìdì bùtòlweshà mèbà ne mingòngà mbubèngùbwe, ne bìdì pabwìpì ne kwediibwa mulawu, bwòbù bìdì ndekeelu ne cyà kwoshiibwa. (Ki mwena bupidyà nyéyè awu.)

³⁷⁸ Mpindyewu tàngilààyi Pòlò. “Kàdi, bananga, . . .” Mpindyewu ùdi ùteeta kwamba bwà aba bàdì bàteeta kwalukila mwinshì mwà mikenji, nudi bamanyè's, bàteeta bwà kwenza byenzedi byònsò byà mikenji abi, kàdi pààbò mbenji bàà mishìngà ne mwàbò mwònsò. Bàdì ne mabàtiiza ne ditentekelangana dyà byanza, ne bintu byònsò ebi.

Kàdi, bananga, tudi batwìshùbwe bwà bintu bitàmbe bwìmpè bwà bwalu bwènù, . . .

Ki bwalu mbwòbù abu's. Mutèèlèjaayaaku mpindyewu.

. . . ne bintu bìdì byènda pàm wè ne lupàndu, nànsha mùdìbì ne—nànsha mùdìbì ne ku eci tudi twakula mùshindù ewu.

Bwalu Nzambi kì mmupangè kwikala mwakàne bwà kupwàye mwoyi byenzedi byènù ne midimu mikolè yà dìnanga to, yinùdì baleejè bwà dìnà dyèndè, mu mùshindù wà ne nwènù nudi bakwàcìle bansantu mudimu, ne munùcìdì nubàkwàcìla.

³⁷⁹ Nudi numòna cìdiye wàmba aci anyì? Kèna wàmba bwà beena Kilistò bàdì bàdìshìnda, kabiyikù mwà kwenzeka bwà kwalukilabò to. Ùdi wàmba bwà beena kwitabuujà bàà musunya bàdì ne mmwèkelu wa kwìsùkwìsù wa dilongolola. “Kàdi,” mùdiye mwambè, “bwènù nwènù bàdì balediibwe cyàkàbìdì, nwènù bàdì beena Kilistò, bananga, tudi batwìshùbwe bwà bintu bitàmbe bwìmpè bwà bwalu bwènù. Kanwèna nwamba bintu abi to. Kanwèna ne nsòmbelu wa mùshindu awu to. Nudi bakùbiibwe pàm wè ne Kilistò.”

Cìdiye mwambè pashùshe kaaba aka ncinyì? Mpindyewu tuyaayaaku ku Ebèlù 10, kutùvwà mu dìndà aku, cyàkàbìdì. [Katùpà kàà mukàbà wà mèyi munda mutupù—Muf.]

³⁸⁰ Mpindyewu tùbuululààyi kaaba aka, cyàkàbìdì, mu Efèsò 4.30. Nènku twàngatààyi eci, katanci kakesè cyanàànà, ne tütàngilààyi cìdì eci cyàmba, bwà kutwà cyòci eci nyama ku

mikòlò, bwà kwenza ne Mufùndù wùpetanganè ne Mufùndù. Efèsò 4, tùmònààyibi. Efèsò 4.30. Tùbalààyaaku bwa tùmone cìdìCi cyàmba. Tèèlejààyi.

... *kanùbungamiji Nyumà Mwîmpè wa Nzambi*, . . .

Tudi tubàtìijibwa bìshi—bìshi mu Mubidi awu? Nyumà umwe.

Kanùbungamiji Nyumà Mwîmpè wa Nzambi, unùdi *batwibwe nendè citampì too ne ku Ditùkù dyà dipikudiibwa dyènù.*

Mmwômò anyi? Udi mutwibwe citampì mu Mubidi wà Kilistò, ku dibàtiiza dyà Nyumà Mwîmpè, kî nkuumukila ku ditàbuluja too ne ku dikwàbò to, kàdi ntoo ne ku Ditùkù dyà dipikudiibwa dya Mubidi. Ki cyùdi ncyòci aci. Pa nàнку, kakwènakù mùshindù wà wèwè kujimina to.

³⁸¹ Udi umvwa bwôwà. Nènku ki bwà cinyi bwôwà, bwôwà, diciina didi dyènda pàmwè ne mpatà.

Dinanga didi dyènda pàmwè ne diitabuuja. Mémè ntu munangè Taatù wanyi. Ncyèna Nendè bwôwà to, bwalu ndi muMunangè. Kî mmufwányine kungenzela bibi to. Yèyè neàngenzèlè bîmpè. Mémè Nendè bwôwà, ne: “Kaa, ncyèna mumanyè ní Wàcyèna, anyi to.” Nwamònu anyi?

³⁸² Kàdi mémè muMunangè ne: “Èyowà, Taatù, ndi—ndi muKunangè. Ne ndi mumanyè ne Wèwè udi—Wèwè udi Taatù wanyi, ne Udi munnangè, ne ncyèna ne bwôwà bwà ne nkwèpi kuWàlwà kubènga kushààla mulamàte ku Díyi Dyèbè to. Mmulayi Wèbè kùndi.” Mùshindù awu ki wùdi Nyumà wà Nzambi wèza.

³⁸³ “Kàdi, kaa, ngìkalakù mwenzè *cikampànda*, ngìkalakù mwenzè *cikansanga*.” Nwamònu’s, ki wèwè ukàadi uya ku luseke lwà beena ne ànu mikenji awu, cyàkàbidi. Kùdidingikù wàya ku luseke lwà beena ne ànu mikenji to. Nduseke lubi.

³⁸⁴ Luseke lwîmpè ndùdi naalu bwalu. Mmudimu mumana kujikija. Kilistò wàkafwà, ne mpèkaatù wàkashebeyiibwa pàkafwàYe apu. Nènku piikalàbi ne Nzambi ùvwa mukulongòlwè Mwoyi wà Cyendèlèlè: “Bònsò bàdi Taatù muMpèeshe, nebàlwe kùNdi.” Ki bwalu mbwabù, kwèna mwà kujimina nànsha. Udi mukùbiibwe kashidi. “Bwalu ku Nyuma umwe nkutùdi bònsò babàtìijibwe mu Mubidi wùmwè, ne ku mulàmbù wùmwè Yèyè wàkatùpwàngaja bwà kashidi. Ki bwalu mbwabù’s. Kakwèna mùshindù wà twètù kujimija to. Menemene. Mpindyewu, kacyènakù cyèna ne ùdyùmwè bîmpè anyi?

³⁸⁵ Mpindyewu, udi umanya munyi ne udi mwena Kilistò? Mpàdi nyumà webè ùfila bujaadiki pàmwè neNyumà Wendè, pàdi dinanga dyà Nzambi munda mwà mwoyi wèbè, paùdi ne dinanga, disànka, ditalala, mwoyi mule, musàngeelu,

lutùùlù, bwímpè, bupòle. Mpaùdì . . . Mamuma a Nyumà àlonda nsòmbelu webè.

³⁸⁶ Kí nnè bwalu udi mwà kujà maja mu Nyumà, kaa, mu cyonà cyà bwena leelù eci to, wela mbilà yà disànka milondàngàne ne cisanji cyà pyànò, mu kujà kwà maja a mu Nyumà aa búngì cyaanàanà kaaba aka to. Bintu abi bìdì ànu bilenga. Kàdi mbyangàte cintu cyònsò mu kaabujimà bikacishìye ku luseke lwà beena ne ànu mikenji, nwamònu's, ne ki bwà cinyi, mbashiile Nyumà wa Nzambi ànu mwàmwa.

³⁸⁷ Ki bwà cinyi, pàabangi Nzambi kuDimwènesha, bàmbi ne: “Lukutukutu. Twètù katwèna baswè kwikala ne bwalu ne Aci to.” Kí mbamanyè Nzambi to. Kacyà bóbò kabàtukù banji kuCimòna to. Kabèena mwà kuCyùmvwà to, bwalu mùdì mwoyi mushiilàngàne munda amu. Kí mmumanyè to, mpoopu kí mmumanyè cìdì blé munkacì mwà kwenza to. Yèyè ùdì ne mwoyi mushiilàngàne.

³⁸⁸ Mùshindù awu ngùùdìbi ne mwena Kilistò, bwà mwena kwitabuuja wa musunya, mulàki wa mukana, udi upàtuka ùkajikula ne: “Kaa, èyowà's, mèmè's ndi mwena Kilistò.” Ne cifwankà cinène ku mishiku, mwenzè bu ngombe wa mu Texas mutùùla nsèngù.

³⁸⁹ Mukàji muvwàle kapùtulù kèndè, wàmba ne: “Kaa, èyowà's, s'ndi cidimba cyà èkèleeziyà. Bushùwà's, s'ki cindì.” Mamuma èbè's àdi àjaadika ne wèwè udi ànu wa musunya wetù ewu. S'mmwòmò. Ncyà bushùwà ne, mmùdìbi. Kùdì cintu ànu cimwèpelè cyà kwamba pa bwalu abu: anyì ndishààdila dyà mu byeledì byà meeji anyì nnyumà wa dyalakana mukwikile. Ncyà bushùwà.

³⁹⁰ Wèwè uswè kwenza maalu bu bàà pa buloba, Bible mmwambè ne: “Wèwè unanga maalu a pa buloba anyì bintu byà pa buloba, dinanga dyà Nzambi kadyèna nànsha mene munda mwèbè to.” Pa nànkù's ki bwalu abu.

³⁹¹ Mpindyewu, wèwè udi wamba ne: “Kaa, Bible's mmwambè, dîbà adi mèmè's ndi ne cyà kwenza nànkù.” To, aci kí ncyòci to. Shàala kaaba aka too ne piikalà Kilistò mukwenzèle cintu kampànda, cìdì cyùmushà abi mu wèwè. Dîbà adi udi mulediibwe ku Nyumà wa Nzambi. Kí ncyùdì wèwè wenza to, ncìkaadiYè Yèyè mukwenzèle aci. Too ne pawàpetà dinanga dyà ne ukàadi muumùke ku lufù muyè ku Mwoyi. Nènku dîbà adi tàngilà nsòmbelu webè, ní ùdì—ní ùdì ùpetangana. Kí nnè mbwalu udi utèeta bwà kwenzeja nsòmbelu webè to, kàdi mbwalu Nzambi ùdì ùkubweja mu bukòokeshi bwà Nyumà Wendè. Kí ngwèyè udi udilombola mu njila wa Nzambi to. Nzambi ngudi ukulombola mu njila Wendè Yèyè mwinè. Udi ulombola kí ngwèwè to, kàdi Nzambi ngudi ulombola.

³⁹² Mpindyewu tàngilàayi eci, mpindyewu, patùkaadi ànu twenda tupweka batàngile ku ndekeelu apa. Mvensà wa 11.

Ne tudi tujinga bwà yònsò wa kunùdì àleejè cyà bushùwà lukunukunu lumwèlumwè alu too ne ku ditwìshùbwa dyà ditèkemena adi too ne ku ndekeelu:

Bwà kanwìkadi mwà kwikala beena lulèngù to, kàdi balondi bàà aba bàdì ku diitabuujà ne lutùulù bàpyàna mulayi.

393 Mpindyewu, ànu kaadíyì kakwàbò kàmwè kàà kushààla batàbàlèèle kaaba aka.

Bwalu Nzambi pàakafilàye mulayi kùdì Abraham, bu mùvwàye kàyi mwà kudìcipila ku kampàndà nànsha umwe mutàmbe bunène to, yéyè wàkadìcipila ku yéyè mwinè,

Wamba ne: Mbushùwà ne mu kubènèsha mèmè nènkuwudijè, ne kuvudija, mèmè nènkuwudijè.

394 Nzambi pàakatwilanganàYe ne Abraham's! Mpindyewu, Abraham wàkapeta cipungidi, kàyikù ne dikumbanyina to nànsha dikesè. Cipungidi cyàkenjiibwa ne Abraham. Kàkùyi mpatà to nngàsà, ànu pa yéyè. Abraham kàvwa muntu wa mutàmbe bwìmpè to. Kàvwa muntu wa beena cijila to. Ùvwa ànu muntu wetù wa pàtupù ewu. Nènku Nzambi, ku disungula, wàkasungula Abraham bwalu Nzambi wàkamusungula; kabiyi ne bwalu Abraham ùvwa mucìswe, bwalu Abraham ùvwa mwenzè *cikampànda*, bwalu ùvwa muntu mwìmpè, bwalu ùvwakù ne dikumbanyina kampànda to. Kàdi cìvwa ndisungula dyà Nzambi. Nzambi ngwàkangata Abraham.

395 Leelù ewu mungàmbì, ngeela meeji, ne: “Tudi tusòbola bayiishi bèètù.” Tudi tuya eku ne eku, twamba ne: “Èè, umwe wa ku balami muumùke. Tùpetàayi muntu udi mutàmbe bwìmpè mu citanda emu bwà kwangata kaaba kèndè. Èè, mpaasàtà muumùke; tùjandulàayi, tùpetàayi udi mutàmbe bwìmpè.” Mìngà misangu kí mbìmpè to.

396 Pàakasòbolàbo muntu bwà kwangatayè kaaba kàà Yudààsà, s'jàakapeta muntu uvwa kàyi ùkèngediibwa. Bàakapeta muntu mukàlàngà, Màtiyààsà, mufùndi munène, mumanyi wa dibàla, cyenda ne mikàndà wa mfùmù. Kwambabò ne: “Neàngatè ànu mwaba mu wòwò. Balùmyànà, yéyè's ùdi ne mmwènekèlu ànu wa muntu wa bushùwà.” Kàdi kacìvwa disungula dyà Nzambi nànsha. Kì kwangatayè muntu ewu, kàdi kààkenzelakù Nzambi kantu nànsha kàmwè to.

397 Kàdi Nzambi wàkasungula keena Yudà kakesè, kàà kale kàà ciiji cicolè, kàà dyùlù dikònyàngàle kàakalwà mwab'awu ne kwìsù kwònsò eku ne: “Mèmè nènnye kuntwaku. Né nènkabàkwàtè.”

398 Nzambi kwambaYè ne: “Ndi mmòna cintu kampànda mu yéyè. Nènkwatè nendè mudimu.”

399 Ki Nzambi kumwènèkaYè ànu cyanààna kumpàlà kwèndè mu Bukènkè bunène abu kuntwaku. Ki yèyè ne: “Wèwè udi Nganyì, Mukalenge.”

400 Yèyè ne: “Ndi Yesù. Mòna’s, mbikolè bwà wèwè kukàndamana. Udi uNkèngesha bwà cinyi?” Mùshindù awu, ki Nzambi kwangataYè muntu *awu* ne kumuvwijaYè umwe wa ku bantu batàmbe bunène bàkaadiku badyatè pa buloba apa kacya ànu ku Yesù Kilistò kwàka. Aci ncìvwà disungula dyà Nzambi.

401 Leelù ewu, twètù tudi tuteeta kwenza disungulula. Nwèndù maèkèleeziyà, nudi nutùma muntu *kampànda* apa, ne muntu *kansanga* apa. Pààbi kabyèna ne cyà kwenjiibwa mùshindù awu to. Nzambi ngudi ulombola. N’Nzambi mu byònsò, ku byònsò, kumutù kwà byònsò; kì neidi mukànda kampànda mutwà cyàlà wà èkèleeziyà kampànda awu to. Cidi Nzambi mwambè pa bwalu abu ki cidi cyènza dishiilangana.

402 Mònaayi. Nzambi wàkenzela Abraham mulayi, kabiyi byà mushingà mwenza to. Nènku mpindyewu, anji indilaayi, kabivwa bikèngela bwà Abraham kwikalayè mwenzè kantu nànsha kàmwè to. Nzambi kwambaYè ne: “Mémè ngukàadi mumanè kucyènza.”

403 Nzambi wàkenzela Adàmà mulayi, ne: “Adàmà, wèwè kùyi mulengè *cikampànda*, newikalè ne mwoyi bwà kashidi. Kàdi ditùkù diwàdyàku, ditùkù adi ki diwàfwà.”

404 Adàmà kwambayè ne: “Ndi ànu ndikonka ne byònsò ebi bìdi cinyi’s, twamb’eku twamb’eku?” Ùya nùnkù ùmba ùkacidyà, ùshintulula kakùyi dyanayisha’s.

405 Musangu wònsò wùdi Nzambi wènza . . . wùdi muntu wènza cyèndè cipungidi ne Nzambi, anyi Nzambi wènza ne muntu, muntu ngutu unyanga lwèndè luseke. Pa nànkù kukèngelabi bwà Nzambi ènzè cintu kampànda, bwalu Wàkamòna civwà muntu. Nènku bóbò bàvwa badyànjila kulongolola, bàvwa basungula, ki kukèngelabi bwà Nzambi ènzè cintu kampànda. Pa nànkù Nzambi wàkatùluka ne wàkeenza cipungidi Cyèndè ne Abraham, kabiyi byà mushingà mwenza to. Bu ne kabivwà byà kabiyi byà mushingà mwenza to, nùnkù Abraham mmujimine, ànu kale kwònsò aku.

406 Tàngilàayi mùkaadiye musòmbe ku Guerar kwàka, mutwè cimpingà, wàmba mashimi. Mufile mukàjèndè kùdi muntu mukwàbò, bwà kusungila mwoyi wèndè. Muntu kaayi’s wè! Musòmbe mwab’awu, ne mutwè cimpingà. Nzambi ùvwa mumwambile, ne: “Kuumuku mwab’ewu to. Shààla mwab’ewu.” Ciyòlè cyà nzala kumusàkaci bwà kupàtukamù. Kuyayè wènda ùlalakana too ne ku mwaba wùvwà mutàmbe kupeepela bwà kuya. S’nudi bamanyè cidi cyènzekelà muntu pàdiye wàngata njila mupepèle.

407 Kupàtukayè wènda ùlalakana, mu mwaba wùvwà maalu matàmbe kwikala mapeepèle. Nènku pààkakùfikàye, yèyè's wàkambila mfùmù awu ne mukàjèndè awu ùvwà mmwanààbò wa bakàji, bwà kusungila mwoyi wèndè. Mpindyewu, s'cìvwa mashimi. Ne muntu kanà yònsò ewu, udi mufwànyine kufila mukàjèndè kùdi mukwàbò muntu, bwà kusungila mwoyi wèndè! Ki yèyè awu, musòmbe mwab'awu mu kantentà kakesè, mutwè cìmpingà, munkaci mwà kwamba mashimi, ciinè aci pambèlù pàà. . . yèyè yònsò mukòsolola ne mulayi ne byònsò, kàdi's ùvwà ànu mupròfètà wa Nzambì.

408 Nènku ki Abimèlèkà awu mwab'awu, ùvwà muntu mwîmpè, wa beena cijila. Bushùwà, wènta masambila èndè dilòòlò dyònsò. Kupetayè kaakù-mukàji awu, wa bidimu lukàmà, mulwè kuntwaku, mwalùkile ku bulenga bwà kwisù ne ku bunsongàakàji. Yèyè ne: "S'ki nsongàakàji ùmvwà mwindilèndile wàwa, nànkù nêngùikalè ànu ne cyà kumusèla."

409 Abraham kwanbayè ne: "Udi mwà kumwangata's. Mmwanèètù wa bakàji."

Mukàji pèndè ne: "Mmwanèètù wa balùme pàdiye apu."

410 Ki kuyayè nendè kuntwaku ne kwambilayè bakàji bwà kumwoweshabò màyi kumushiya kapèlu ne—ne kumuvwàdika bilàmbà bilenga, ne kumulongolola mwenzè bu—bu mwànà wa mfùmù. Ki kwenzayè masambila èndè, kudyòlodayè pa bulààlù, ne kutàngijayè makàsà muulu, ne kwambayè ne: "Mààlabà, mèmè's nêngenzè dibàkà ne nsongàkàji mulenga wa beena Ebèlù wàwa, mwanààbò wa bakàji wa nsongààlùme udi pambèlù pààpa wàwa—wàwa. Kaa, s'nebiikalè bilenga be. Éyi Mukalenge wa yààyà, Wèwè's udi mumanyè muntù muKunangè! Èyowà's, mukalenge. Bilenga byà kacya!"

411 Kàdi Nzambì kwambaYè ne: "Wèwè's udi ànu muntu mufwè wetù ewu." Uh-huh!

412 [Mwanèètù Branham ùdi ùkòlola—Muf.] (Mfwilàayikù luse.) Abra-. . . Mòna's, Abraham ùvwà musòmbe mwab'awu, ùshima, mutwè cìmpingà. Kàdi ki muntu awu nyèyè awu, muntu wa meeji matòòke ne mwakàne ne mululàme. "Mòna's," mwàkambàye, "Mukalenge, Wèwè's udi mumanyè bululàmè bwà mwoyi wànyì. Yèyè kí mmungambile ne, ùvwà m' "mwanààbò wa bakàji' anyi?"

413 Yèyè ne: "Ndi mumanyè bululàmè bwà mwoyi wèbè. Ki bwà cinyi Ndi nkupangisha bwà kùNgenzèdi mpèkaatù to. Ncyà bushùwà. Ndi mumanyè bululàmè bwà mwoyi wèbè. Kàdi bàyèndè awu mmupròfètà Wanyì." Àlèluuyàh! Kaa, aci cyòci kacyi ngàsà to, ncinyi? "Muntu mutwè cìmpingà, wamba mashimi, musòmbe pambèlu pààpa, kàdi ùdi ànu mupròfètà Wanyì. Angàtà mulàmbù, ndà kùdiye aku, ne alùjà mukàjèndè awu, bwà cyanààna wèwè udi muntu mufwè. Ncyàkutèeleja kàbìdi masambila èbè to. Yèyè àkusambidilè." Amen. Ki bwalu mbwabù's. "Mmupròfètà Wanyì awu."

Mpindyewu, wêwè udi wamba ne: “Kaa, ndi njinga bwà ngikalakù nànsa Abraham.”

⁴¹⁴ “Pìikalàbi ne tudi bafwè mu Kilistò, tudi Dimiinu dyà Abraham, ne bapyànyi bilondèshìle mulayi.” Cyà bushùwà. Ki cìdì Bible mwambè. Nudikù baswè ku Cìbala anyi? Mòna’s, Bible mmwambè ne—ne mulayi kawùvwa ànù kùdì Abranham ne mamiinu èndè nkààyaabò to. Bu mùdì wêwè. . . Abraham ùvwa ne mamiinu àbùngì, cyà bushùwà, bàna bààbùngì. Ishàmèlà’s ùvwa mwanèndè. Yéyè’s wàkapeta bàna mwandamutekète anyi mwandamukùlù paanyimà pàà Sarah mumanè kufwà, mubàlèlè ne mukàjì mukwàbò, Keetùlà. Kàdi, tàngilààyi, dimiinu adi ndìvwa dimiinu dilaya, òvwa Izàkà, ne ku Izàkà nkwalakùlù Kilistò, ku Kilistò twètù kulwa. Mulayi ngwà kabìyi byà musingà mwenza to.

⁴¹⁵ Mpindyewu, bìshi bwà Abraham? Mòna’s, nùnkù bwèndè’s mbutùùke, nùnkù’s bìvwa mw’à kwikala kabìyi mwà kwenzekakù to bwà yéyè kwalukila cyàkàbìdì. Bushùwà’s. Nùnkù’s bìvwa mwà kwikala kabìyi mwà kwenzekakù to bwà Shawùlà kwalukilayè cyàkàbìdì, bu byòbì nànkù, nùnkù’s bìvwa bìkèngela nùbalè Mufùndu awu mùshindù awu. Nwamònu anyi? Kàdi kabìvwa nànkù to. Mulayi wà Nzambì wùdì wùshàalakù kashidi.

⁴¹⁶ Twànjààyikù kubala kaaba aka bwà katanci kakesè cyanààna. Ndi muswè nùCìbalè. Ndi muswè nwàngatè Ngalàtiyà 3.16, bwà nùbalè cyòcì eci, ne nùumònè mpindyewu cìdì mulayi, ne nùmònè ní—ní twètù tudi mulayi Wèndè anyi to, 3.16. Tèèlejààyi apa. Èyo. Nèngìikalè mwà kubala kàbìdì mvensà wa 15 awu.

Bàna bèètù, ndi ngaakula mu mùshindù wà bantu; Nànsa mùdìbi ne cipungidi ncyenza kùdì muntu, nànsa nànkù cyòcì ciikàlè cishìndika, muntu nànsa umwe kènà ùcìvwija cyà cyanààna to, anyi kènà ùsàkidilakù kantu nànsa.

Mpindyewu kùdì Abraham ne dimiinu dyèndè, (Dimiinu, d-i-m-i yìbìdì-n-u.), kùdì dimiinu dyèndè nkùvwa mulayi mwenjùbwe.

“Kùdì Abraham ne Dimiinu dyèndè.” Mpindyewu tàngilààyi.

Yéyè kàakamba ne: Ne kùdì mamiinu èbè (ku bùngì) to, byenzè bu ne àvwa àbùngì; kàdi mbu. . . òmwèpelè ne: Ne kùdì dimiinu dyèbè, dìdì Kilistò adi.

⁴¹⁷ Dìbà adi, Kilistò nguvwa Dimiinu dyà Abraham adi. “Ne twètù bu mutùdì bafwè mu Kilistò, ne babàtìjùbwe mu Mubidi Wèndè, tudi Dimiinu dyà Abraham, ne tudi bapyànyi bàà mulayi awu.” Dìbà adi mmunyi mùdìbi ne, mmunyi muwìkalàku mwà kudìshinda, pìikalàbi ne wêwè ngudi Nzambì mwenzèle mulayi

awu? Mmunyi muwikalàku mwà kutwà cìmpìngà, ne kulaluka ne kukèngelabi bwà wèwè kuya mu ifernò bwà cyòci aci?

418 Mpindyewu, wèwè udi wamba ne: “Èè, twètù katwèna mwà kutwà cìmpìngà anyi?” Kakùyi mpatà to. Kàdi paùdi utwà cìmpìngà, s’newikalè mwà kucìpetela dinyooka, kutàcishi meeji to. Abraham’s wàkadipeta, ne bakwàbò bônso’s bàakadipeta, ne wèwè neùdìpetè. Kwèdi meeji ne cìdi cìkupèèsha bukenji bwà kwenza mpèkaatù to. To. Neùyoobè bwà cyònsò cyùdi wenza. Neùpoolè byùdi ukùna abi. Wenza kampèkaatù kakesè kàmwepele kàdi upòola mbaafù mujimà tentè. Ncyà bushùwà’s. Kàdi, mwanèètù, aci kî mbwena kwamba ne udi mujimine to. Ncyà bushùwà menemene. Abraham wàkapòola ànu menemene cyàkakùnàye. Ncyà bushùwà. Kàdi ùvwa ànu musungidiibwe.

419 Cipungidi cyàkenzà Nzambi ne Izalèlèl: bàakajimija bumpyanyi bwàbò, bàakajimija buloba bulaya ne bàakaya mu Èjiiipitù, kàdi kabàakajimija cipungidi cyàbò to. Nzambi wàkamba ne: “Ngävùluku mulayi Wanyi kùdi Abraham. Ngävùluku, nènku Ngätùluku bwà kusungila cisambà Cyanyi. Ndàaku kuntwàku, wèwè Mòsà, wàmбилè Pàlò ne, Mémè ngàmби ne: ‘Lekèlè bantu Bàanyi bàye.’ Ngävùluku ne Ngàkenzela Abraham ne dimiinu dyèndè mulayi.”

420 Cintu cìmwècìmwè aci ncìdi kutùdi twètù. Pa nàнку wèwè mufwè, ne mwoyi wèbè musokoka mu Nzambi, kupicila ku Kilstò, kakwèna cintu nànsha cìmwè pa buloba apa cìdi mwà kukulengakù to. Mpindyewu, udi mufwànyine kuya ne kwenza bubì, kàdi wèwè ànu cyà bushùwà, bulelèlè menemene, mwànà wa Nzambi, ne mumòne ne udi mwenzè cilèma, neùjuukè kuulu bwà kubangulula. Ncyà bushùwà, ne kwàkushàala kacya walàadila panshi apu to.

421 Kàdi wèwè mwikalè mutulùmùke, pawikalà mpoopu, kwòkù kakùyikù “juukilà kuulu” mu wèwè, newàmbè ne: “Àà, èè, kaCìvwa ne bwà nsongo tohù’s, twamb’eku twamb’eku.”

422 Bukalenge bwà Nzambi mbufwànàngàne ne muntu wàkangata bukòndò e kuya ku mbù, kubwèlayèmu. Pàkalwàye, wàkapeta nkùvù, ndimbà, nyòka, misodyà, ntànda, ne mishipa. Ki mùdi Èvànjeeliyò pàdìbo bàMuyiisha.

423 Mùdi Mukalenge mwà kwambila mwambi kampànda, bu mùdi Mwanèètù Graham ne: “Ndà mwaba *ewu*. Ndà mu disangu *edi* ùlobè mishipa katanci kakesè, Mwanèètù Graham.” Èyo, wàngata bukòndò bwèndè ùya kuntwaku ne ùbanga ne bukòndò bwà cyàtà.

“Kùyaaya nkwèpì nàнку, Mwanèètù Bill?”

“Nyààya ku mwaba mukwàbò kampànda, nkeela bukòndò mu disangu *emu*.”

424 Ndi nkòka ne: “Mbòbò abu, Mukalenge, Wèwè ngudi mumanyè cìdìbo.” Nkòka cyàkàbìdì bukòndò abu ne: “Èyo, ki bòbò aba, Mukalenge.”

425 Mpindyewu, nkùvù ùvwa nkùvù, ànu kwinè kwònsò aku. Cyùdì udi wèwè ànu mukwàcìibwe mu bukòndò cyanààna. Ncyà bushùwà. Nènku mùshindù awu ngudi bantu bàkwàcìibwa mu disaluka ne: “Kaa, àlèluuyàh! Àlèluuyàh! Mukalenge àtumbè! Butumbi kùdì Nzambi! Àlèluuyàh!” Mbakwàcìibwe ànu cyanààna mu bukòndò, kwàjìkì.

426 Byòbì ne nyumà wa kale wa nkùvu awu ngudi munda mwèndè, kabyàkunènga to, neámbe ne: “Èè, ndi nkwambila. . .” Ki yèyè uyààya wàwa, wàlukila wènda ùdìkòka.

427 Nènku inábànza Lushishà wa kale awu neámbe ne: “Kàdi ncyènà ànu mwà kuumvwa Aci to.” Nwamònu anyi?

428 Màmèmwàzèlè Ntànda ùsòmba mwab’awu katanci kakesè, wènzà ne “plop, plop, plop,” wàlukila buludì ne: “Èè, kaMùvwa nànsha cyà nsongo to, twamb’eku twamb’eku.”

429 Màmèmwàzèlè Nyòka neámbe ne: “Kaa, s’mmusumbà wà bansantu babùnguluki bàà mu malaba’s. Ki cyònsò cìdìKu ncyaci. Nènye kùdìbo ne cyumvwilu cìmpè kutàmba abi.” Mòna’s, wèwè’s utu nyòka, ànu kwinè kwònsò aku. Bukòndò bwà Èvànjeeliyò mbùdì bukukwàte pàabu cyanààna, ki cyònsò cìdìku.

430 Kàdi mushipa wòwò bàyaaya naawù ku mèèsà a Mfùmù. Wòwò wùvwa mmushipa, ànu kwinè kwònsò aku. Dimiinu dyàwù òvwa mmushipa. Wàkabanga, mushipa, ne Nzambi ùvwa mumanyè mushipa Wèndè awu kacya ànu ku difukà dyà dyulu ne buloba. Àlèluuyàh!

431 Vùlukàayi ne, bònsò abu bàtu bèeyela ànu màyi a bitoci àmwèamwè awu muntwamu. Bònsò abu bàtu bèeyela ànu mu kasùlù kàmwèkàmwè aku. Ncyà bushùwà. “Twètù bònsò tutu benzè. . . tunwà ku Lubwebwe lwà nyumà lùmwèlùmwè alu. Bònsò bàakadyà manà mu cipèèlà.” Kaalèbà ne Yoshùwà bàakadyà manà àmwèamwè àvwà—àvwà bakwàbò abu bàdya awu. Kàdi bònsò abu bààkapòna mu cipèèlà. Kàdi kùvwa basungula bàbìdì bàvwà ne cyà kusabuka, ne bòbò bàakasabuka. Ncyà bushùwà.

432 “Twètù bònsò’s tudi tunwishiibwe ku Mpokolo umwèumwè awu.” Kàdi kí mbònsò bàdì bànwa bàdì bàsùngidiibwà to. Twètù bònsò mbatùfikishe ku dyela dyà mbilà. Twètù bònsò mbatùfikishe ku dicyònkómoka pàmwè. Kàdi Basungula mbàdì basùngidiibwe. Nukààvwakù bamòne anyi? Ncyambè ne: “Nyumà yìbìdì ayì, mu matùkù a ndekeelu, yìvwa mwà kwikala mifwànàngàne mu mùshindù wà mifwànyine kuseeswisha ne Basungula biinè bu ne bìvwa mwà kwenzeka,” *bu ne bìvwa mwà kwenzeka*. Nwamònu anyi? Ki Nyumà mulelèlà wa Nzambi nyawù, basungula bwà Mwoyi wà Cyendèlèlè.

433 Mpindyewu tukàadi tujikija. Pashiishe Mwanèètù Neville nèngacilè mwaba wúndi ngiimanyina awu. Èyo.

Nènkù ndi ngamba nùnkù ne, cipungidi, cyàkashindiküübwa kumpàlà kùdi Nzambi mu Kilistò aci, mikenji, yìvwà bidimu nkàmà yìnaayi, bidimu nkàmà yìnaayi ne makùmi àsàtù pashiishe, kayèna mwà kuwija cyanààna to, bwà bikèngela yìvwijè mulayi wà Nzambi kawüyi ne bwenzeji.

Aci mmulayi wàkapèèshàbo Abraham kùdi Nzambi, kumpàlà kwà mikenji kayi yi myanji kwikalakù.

Bwalu pùikalàbi ne—bwalu pùikalàbi ne bumpyànyi mbufume ku mikenji, kabücyèna kàbidì bufume ku mulayi to; kàdi Nzambi wàkabùpèèsha Abraham ku mulayi.

Ki nku cintu nànsha cimwè cyùdi wèwè wenza, kî nku mikenji kampànda, mikènji kampànda yà èkèleeziyà wenù, ku diya kashàala wa mu èkèleeziyà, anyi mikenji mikwàbò kampànda to. Kaküyi mpatà to ncyenzedi cyà ngàsà cyà kùdi Nzambi, bwèbè wèwè. Ki bwalu mbwabù's.

434 Tàngilàayi.

Nànkù mikenji yìdi ne mudimu kaayi? Yòyi yàkasàkidiübwa bwà bwalu bwà dishipa dyà mikenji, too ne pàvwà dimiinu adi ne cyà kulwa divwàbò benzèle mulayi awu; . . .

Aci kî nci tòòke tòò ànu mùdi dyùlù kwìsù kwànyi eku emu anyi? “Yàkasàkidiübwa, bwà kukwàtayi mudimu too ne pàakalwà Dimiinu, divwà Kilistò, Uvwabò benzèle mulayi.”

. . . ne yàkafidiübwa kùdi banjèlo bu dîyi ditùma ne mu byanza byà mutwàngaji.

Mpindyewu mutwàngaji kî mmutwàngaji wa umwe to, kàdi Nzambi üdi umwe.

435 Mpindyewu, ndi nshìla apa mene, bwà Mwanèètù Neville kubangilayè apu mene, bwà mu diisàtù dilwalwà.

436 Mpindyewu nudi bumvwè citwàmbi aci anyi? [Disangisha didi dyamba ne: “Amen.”—Muf.] Bwà ne kaküyi mpatà to kabyèna mwà kwenzekakù to bwà mwena Kilistò mulediübwe cyàkàbidì udi. . . Mpindyewu, ncyèna njinga kwamba ne, üdi üdibükila yèyè mwinè ne, “mmulediübwe cyàkàbidì” to. Ndi njinga kwamba ne, mwena Kilistò mulelèlè, mulediübwe cyàkàbidì, bwà üdishinda ku ngàsà, kèna mwà kucyènzakù to. Üdi mwà kudishinda, aci mmwòmò, kàdi, nànsha bìshi, kènaku mwà kupàtuka mu ngàsà awu to.

Abraham wàkadishinda ku ngàsà. Bushùwà, wàkadishinda. Nzambi üvwa mumwambile bwà “kushàala mwaba awu.” Yèyè wàkapàtukamù, kàdi kàakajimijakù cipungidi cyèndè to.

Ùwva ànu musungula wa Nzambì. Ùwva mmupròfetà musòmbe mwaba awu. Ki civwàye misangu yònsò. Neikalè misangu yònsò ànu wa Nzambì.

437 Mpindyewu mònaayi. Bible mmwambè, ne: “Izàlèlèlà mujimà neàsungidiibwè.” Mbanganyi bàdì bamanye nànkù? Bible mmwambè ne: “Izàlèlèlà mujimà neàsungidiibwè.” Mpindyewu: “Izàlèlèlà kî ny’Izàlèlèlà udi wa mubidi awu to, kàdì Izàlèlèlà wa mu Nyumà, bwalu mapà ne mabìkila kî ngàà dinyingaleela to.” Ki cìdì Bible mwambè anyi, mu mvensà menemene udi ulonda awu anyi? Ngalàtiyà. Èyo. “Izàlèlèlà mujimà neàsungidiibwè. Yònsò wa kùdìbò mmusungidiibwè.” Tudi tulwa Izàlèlèlà munyi? “Bìkàlè bafwè mu Kilistò, tudi bavwàle Dimiinu dyà Abraham, ne tudi bapyànyi bilondèshìle mulayi.”

438 Pòlò mmwambè ne: “Ewu udi wa pambèlupambèlu kî ngudi mwena Yudà to, kàdì ng’ewu udi wa munda, ki mwena Yudà, Bàdì balaya abu.” Nènku twètù tudi Dimiinu dyà Abraham, ku mulayi, ku Kilistò, tuMwitaba bu Musungidi wetù sungasunga.

439 Kaa, ndi ntèkemena ne nudi bacimòne. Ndi ntèkemena ne nudi bacyūmvwè, bu nwènù mwà kushààla naaCì katàncì kakesè cyanààna. Mpindyewu mwòmò emu mmutùdì tujikijila eci, pashìshe tubanga ne Melekisedekè, cìdì cyàlukilà buludì cyàkàbìdì mu cyòcì eci. Tudi tubangulwila buludì ku . . . Kaa, Cìdì ànu, cintu mu kaabujimà ncilenga be. Kàdì tudi ànu tutungunuka ne kubwela nu bintu byà busùkusuku abi.

440 Mpindyewu, nwamònu’s, wèwè mwangàte Eci *apa*, mbyenzè bu ne, bu wèwè mwà kuCìbadila ànu ku dijooja cyanààna, ànu mùdì Trinitaire wa maalu muumisha ncyoncyoncyo, udi witabuuja ne kùdì Nzambì yìsàtù awu, wàkangambila musangu kampànda, ne: “Kakùyì mpatà to Maatàayi 3 mmwambè patòòke ne kùvwa Bapersona bàsàtù, bàsàtù mu Bunzambì.”

441 Mèmè ne: “Bikèngela ncimònè.”

442 Yèyè ne: “Tàngilà.” Mwimàne ànu mu cyambilu eci, kwambayè ne: “Tàngilà kùneeku, Maatàayi 3,” yèyè ne: “Pààkapàtùkà Yesù buludì mu màyi, mònaayi, maulu àkaMuunzulukila, ki kumònaYè Nyumà wa Nzambì mwenzè bu nyuunyi wa nkuci. Ki Diyì difùma mu Dyulu dyamba ne: “Ewu m’Mwan’Àanyi munanga, ùNdì Mèmè nsànkila bìmpè.” S’ki bàsàtù mbòbò abu: Mwànà ku mwelelu wà musùlù; Nyumà Mwìmpè pankacì; ne Taatù kuulu.”

Mèmè kwamba ne: “Mwanèètù, Mufùndu awu kawèna ùbadiibwa nànkù to.”

“Kaa, èyowà’s, s’mmudìWu wùbadiibwa.”

Mèmè ne: “Mpindyewu, Wùbalèbi cyàkàbìdì tǔng, ùsanganè ní ki mmùdìWu wùbadiibwa.”

443 Mpindyewu, cimfwànyì cyèndè ncyòcì eci. *Apa* n’Nzambì, Mwànà; *wàwa* n’Nzambì, Taatù; *apa* n’Nzambì, Nyumà

Mwîmpè, mwenzè bu nyuunyi wa nkuci. Mpindyewu tàngilâayaaku. Bible mmwambè, pàakabàtijiibwà Yesù apu ne: “Mwânà wàkapàtuka buludì mu mâyi, môngaayi, maùlu àkuunzuluka kumutù Kwèndè. Ne Dìyi dyàmba. . .” Wàkamòna Nyumà wa Nzambi, Nyumà wa Nzambi, mwenzè bu nyuunyi wa nkuci. Kàyi Mupersonà mukwàbò muulu *amu* to, kàdi Nyumà wa Nzambi ewu nguvwa Nkuci uvwa kumutù Kwèndè awu, ne Dìyi dilwa, dyàmba ne: “Ewu m’Mwan’Àanyì munanga, Mwena munda mùNdi nsànkila bwà kusòmbela.” Mpindyewu, balàayi Maatàayi 3 nùmonè ní kèna wàmba nàнку. Nwamònu anyi? Kí m’Bantu bàsàtù to, nànsha kakesè.

444 Nènku ki mùshindù. . . Eci kacyèna cyàmba ne kabyèna mwà kwenzeka bwà muntu kwalukilayè cyànyimà, pashiishe, pàdiye ùtwa cimpingà to. Kacyèna cyàmba nàнку to. Kacyèna cyàmba nàнку to. Cidi cyàmba ne: “Kabyèna mwà kwenzekakù to bwà muntu kwalukilayè cyànyima bwà kudyàlujulula cyàkàbidi, paanyimà pàa mumanè kwikala kwàka.” Kèna mwà kucyènza to.

445 Bible mmwambè ne: “Ewu udi mulela kùdi Nzambi, kèna wèza mpèkaatù to, bwalu kèna mwà kwenza mpèkaatù to. Bwalu Diminu dyà Nzambi ndisòmbèle munda mwèndè, ne yèyè kèna mwà kwenza mpèkaatù to.” Mmunyi mùndi mwà kubìkidiibwa ngènzàmpèkaatù, pàdiku mulàmbù mutèeka mwaba awu bwà kwangata kaaba kàanyi? Mmunyi mùndi mwà kufwà, pàkaadi lufù lumana kumfucila? Mmunyi mùndi mwà kufwà, pàndi ne Mwoyi wà Cyendèlèlèlè? Mmunyi mùndi mwà kufwà’s? Kwèna mwà kucyènza to.

446 Mmunyi mùndi mwà kwikala ne mukàndà wà dyanyisha wà kùdi mfùmù wa cimenga eci, bwà kunyeemesha lubilu lwà kilòmèetà makùmì citèemà ku dîbà mu cimenga emu, kàdi mpùlushi kanà yònsò ewu ùnkwaà bwà dinyeemesha lubilu lwà kilòmèetà makùmì citèemà ku dîbà? Udi mwà kucyènza munyi? S’ndi ne mukàndà wà dyanyisha wà kùdi mfùmù wa cimenga wùdi wàmba ne ndi mwà kunyeemesha nàнку. Kèna mwà kunkwàtakù to. Dinkwàtà dyèndè—dyèndè, yèyè mmufwànyine kwela kashibà ne bikwàbò byònsò, pàanyi mufwànyine kwenza bu ne kakwèna cintu to. Kacyèna ne cidici cyàmba to; mèmè ndi ne mukàndà wà dyanyisha.

447 Ne mmunyi mùndiku mwà kucyènzne, dîbà adi, pàdibi ne paanyimà pàa Kilistò mumanè kumfwila mèmè mulwè bwakànè Bwèndè bwà ngàsà ne dinanga Dyèndè kùndi? Mmunyi mùndiku mwà kwenza mpèkaatù’s, pàdiku cintu kampànda citèeka pankaci pàanyi mèmè ne Nzambi, mulàmbù kampànda? Ncyèna mwà kwenza mpèkaatù nànsha. Ncyèna mwà kucyènzakù to. Nzambi kèna ùmmònakù mèmè to; Ùdi ùmòna Kilistò. Yèyè mmwimàne pa kaaba kàanyi. Ne pàndi mèmè ngenza ní ncinyi ní ncinyi cyà cibi, Kilistò ùdi wàngata kaaba kàanyi. Nkàadi mwenzè dítonda dyànyi. “Ndi mupiiile. Yèyè mmubingè.

Mukalenge, Wèwè ngudi mumanyè mwoyi wànyì. Wèwè ngudi mumanyè ne ndi ncyàm bilamù anyi to. Kàdi ndi mupiile. Mfwilèku luse.” Nzambi kènàku ùcìmòna to. Mashi a Yesù mmambwikile, dîbà dyònsò. Dîbà adi mmunyi mùdiku Nzambi mwà kummòna’s? Mmunyi mùdiku mpèkaatù mwà kwikala—kwikala mumbadila, pàdibi ne Yèyè kèna mwà kucyènta? Pàndi ànu ne ngàcyènjì, cyàfwìdiibu luse. [Mwanèètù Branham ùdi ùtuuta cishòntò—Muf.] Ncyà bushùwà.

⁴⁴⁸ Ànu bu kwangata ka—kabadi kakesè kàà mamata nùнку ewu, kabadi kakesè kàà mamata a mu mèsù aka, kàdi kukàngata kùle tètè ne màyi a mufùndu ne kukàlamina kuulu kwà mbaafù wa bwanga-butòòkoloji, ne kumacishilamù ànu kaadimata aku, kàdi kutèeta bwà kukàpeta cyàkàbidì. S’kàdi kàndamuka ànu bwanga-butòòkoloji abu. Màyi a mufùndu awu àdi àndamuka bwanga-butòòkoloji. Nèngu ki cyòci aci, mpèkaatù yèbè mitonda ayi, pawikalà mu Kilistò. Pankaci pèèbè wèwè ne Nzambi pàdi mbaafù mujimà wa bwanga-butòòkoloji, ne mpèkaatù webè ùdi ùshààla bwakàne bwalu Mulàmbù mwakàne mmukwindile mwaba awu.

Pàngààfikà ku musùlù ku ndekeelu kwà ditùku,
Ne pùikalà mpeepèlè yà ndekeelu yà
tunyinyinganya mimanè kutuuta;
Kùdi dyeji òmwèpelè didì ònkòleshà ku
mwoyi ne òvwija mwoyi wànyì ne òsànkà,
Kabyàkukèngela bwà mèmè kusabuka Yadènè
nkààyaanyì nànsa.

⁴⁴⁹ Ki cintu cìmwèpelè cyà cìmpè ncyòci aci. Ki cintu cìmwèpelè cyà cìmpè ncyòci aci. Kabyàkukèngela bwà mèmè kumusabuka to. Òmwè dyà ku matùkù aa, netùfikè batàngile ku ndekeelu kwà njila. Dîbà dyà muulu nedibèngè bwà kukenkesha, dîbà adi Nzambi nèbiikilè.

⁴⁵⁰ Adàmà neòlolè cyanza ùnyungisha Evà, wàmba ne: “Munanga wanyì, kwàjiki. Dîbà dyà kubiika dyàkànyì.”

⁴⁵¹ Evà neòlolè cyanza àkwatè Abèlè, wàmba ne: “Lwàku, munanga wanyì. Dîbà dyà kubiika dyàkànyì.” Abèlè neàkwatè Setè. Ne Setè neàkwatè Noà. Noà neàkwatè . . . Kaa, ànu nàngu, ànu nàngu too ne ku Abraham, ànu nàngu pàdibo bènda bàlwa apu. Nekwènzèkè dinyungishangana ne ditàbulujangana dinène pààlwà Mwànà wa Nzambi. Netwìmanè mu difwànangana Nendè mu ditùku adi.

⁴⁵² Mpindyewu, wèwè wenza mpèkaatù pànwapa, neùyoobè bwà bwalu abu. Mèmè nkààdikù . . .

⁴⁵³ Ncìtùngùnùke ànu ne kumvwila mu meeji, bìkèngela ànu ncyàmbè. Ndi muteetè bwà kucikànda, misangu yìnaayi anyi yìtaanu. Bìkèngela ànu ncyàmbè. Mbanganyì bàdiku bavùlùke mwanèètù ewu, mpaasàtà, uvwa ku église de Dieu eku awu?

Mwanèètù, ànu lwa kuntweku's, dyèndè ùvwa nganyi apa's? Ùvwa wènza mudimu ku Vorgang kwàka. Kaa, nwènu bònso... Première église de Dieu, ànu lwa mu disangu emu's. Anyi, ùvwa ùsùmbisha maaRawleigh mu cikondo cyà—cyà lukòta aci. Muntu wa difwànà dyà Nzambi, munsantu wa menemene. Mwanèètù Smith ngwàkangata kaaba kèndè muntwamu. Némvulukè dìnà dyèndè mu tusunsa tukesè emu. Ùvwa mulùme wa Nzambi musungidiibwe.

⁴⁵⁴ Vùlukàayi ne, wèwè kùyi wenda mululàme bilondèshile dikulongolola to, kàdi mwikàle wenza cintu cibì pèèbè mwena Kilistò, Nzambi neakudimwije. Ne dībà adi wèwè kùyi wangata didimwija adi ne mushinga to, Yèyè neakuumùshè dyàkàmwè pa buloba. Ki cikaadiYe mwenzènze.

⁴⁵⁵ Nutukù bavùlùke mu Bible anyi? Tàngilàayi èkèleeziyà wa beena Kolintò. Wàkabàmbila civwàbo, bilondèshile myaba, mu Kilistò. Kàdi wàkabàdimwija bwà civwà mwà kwenzeka. Ki kudìlongololabò, kudyàkajabò, kumpalà kwà Nzambi.

⁴⁵⁶ Kàdi mwanèètù mukesè wa balùme ewu, ùvwa mwanèètù mukesè mulenga wa dikèma, ngeela meeji, mulùme wa Nzambi musungidiibwe. Ki kupetayè mudimu kuntweku ku...ku Vorgang eku. Bàmwè bàà beena fàmiyè wendè bôbò basòmbe mwab'ewu, ndi ntèkemena ne kanwèna nwela meeji ne ndi...Ncyèna munùmanyè to panwikalà basòmbe mwab'ewu. Kàdi, Ramsey, Mwanèètù Ramsey, mbanganyi bàdiku bavùlùke Mwanèètù Ramsey wa ku Église de Dieu eku awu? Bushùwà, nudi bamumanyè, muntu mukesè mulenga wa dikèma. Ne yèyè ùvwa ne ciibidilu cyà kulwa kwànyi kumbèlu ne tuyiikilanganakù, ne tuvwa tushààla basòmbe mwab'awu tudila myadi ne bakwàtàngàne ku byanza; mwena Kilistò mulelèlà.

⁴⁵⁷ Dìngà ditùku mèmè kubwelamù kuntwaku, ncìfuminakù dyàmwàmwà dyà mbù ku masangisha, nkòntonwèsha kàshinyi kàanyi, Mwanèètù Ramsey kwambayè ne: “Nkwenzèlè cinyi, Billy?”

⁴⁵⁸ Mèmè ne: “Kòntononàku kàshinyi aku, Mwanèètù Ramsey. Shintùlùlà màfutà.”

⁴⁵⁹ “Èyo,” mwàkambàye, “bìmpè, bìmpè be.” Yèyè ne: “Udi mwenzè masangisha mìmpè anyi?”

⁴⁶⁰ Mèmè ne: “Kaa, Mwanèètù Ramsey, bìvwa bilenga byà kacya.” Mèmè ne: “Ndi njinga bwà wàyakù naanyi mungà musangu. Kwena uyakù naanyi bwà cinyi?”

Yèyè ne: “Ncìcitu kàbìdì nkwàcila Mukalenge mudimu to, Billy.”

Mèmè kukènzakana, kwamba ne: “Udi muswè kwamba cinyi?”

⁴⁶¹ Kwambayè ànu ne: “Ncìcitu mMukwàcila kàbìdì mudimu to,” pèndè ùmba ùmuka ùya.

462 Mémè kudyàmbidila ne: “Kaa, yêyè’s ùdi wàkula ànu byakùlààkùlà’s.” Mémè kutungunuka, kuya mwaba kampànda.

463 Mémè kwalukila e kubwela mu kàshinyi kàànyì amu. Mémè kwalukila kumbèlu, e kubanga kwela meeji ku cyòci cyà ne: “Ncìcitu kàbìdì nkwàcila Mukalenge mudimu” aci.

464 Mukalenge kutèekaYè pa mwoyi wànyì bwà kwalukila kamukonkaci cyàkàbìdì. Pa nàнку, mémè kwamba ne: “Meda, shààla ùlamè ànu kumbèlu.”

465 Ki mémè kubwela, kubwela mu kàshinyi kàànyì e kwalukilakù, kukiìmanyika cyàkàbìdì, e kubwela mu Vorgang amu. Mémè kwamba ne: “Mwanèètù Ramsey, ndi muswè nkwelèku lukonko.”

Yèyè ne: “Èyo, Billy, ndwà bishi alu?”

Mémè ne: “Wambì, katanci aka ne, kùcìtu kàbìdì ukwàcila Mukalenge mudimu. S’uvwa ànu unyòbola cyanààna’s, kí mmwômò anyì?”

Yèyè ne: “To.”

Mémè ne: “Mwanèètù Ramsey, kwèna—kwèna wambilamù to.”

Yèyè ne: “S’ndi ngambilamù.”

Mémè ne: “Kwèna muMunangè anyì?”

Yèyè ne: “Bu ne mvwa muMunangè, s’mvwa mwà kuMukwàcila mudimu, kí mmwômò anyì, Billy?” ùmba ùmuka.

Mémè kudyàmbidila ne: “Ambà tǔng, Mwanèètù Ramsey!”

Yèyè ne: “Ncyèna muswè kubyàkula kabìdì to.”

466 Mémè kwalukila kumbèlu, kubwela mu cibambalu cyà bulààlù, kwinjila ciibi. Kàdi, kaa, s’udi mumanyè mùdì udyùmvwà bujitu menemene amu, byenzè bu munyenge mwànà bìsùkwità anyì cintu kampànda amu, nudi bamanyè’s. Mémè—mémè kudyàmbidila ne: “Cinyi? Kabyèna mwà kwenzekakù to. Ncyà bushùwà ne cintu kampànda ncyenzèkèle Mwanèètù Ramsey ewu.”

467 Kàdi kùdì mwànà wa balùme mukesè wa bafiike, dyèndè Jimmy, ùtu ùlwa mu èkèleeziyà emu. Ùtu ne mukòlò wùmwè, nudi bamanyè’s; ùtu ùtebuka, bu nàнку awu. Dìna dyèndè dyàmpù mwoyi, ùtu wènza mudimu kwìnè ku Vorgang aku, wèndesha màshinyi àtù àkòka makwàbo manyangùke awu. Kutwilanganayè naanyì, yèyè ne: “Udi mumanyè’s, Révérend Branham,” yèyè ne, “ncyèna mumanyè ne ncinyi cikaadi kùdì Docteur Ramsey ewu kuntweku to.” Yèyè ne: “Ndi mumwambìle, ditùkù adi, ne: “Twètù bònsò aba’s tùvwà ne bwòwà bwà kutùbula nànsha mukana mwab’ewu.’ Yèyè ne: ‘Wèwè ewu’s uvwa muntu wa difwànà dyà Nzambì.’ Kàdi,” yèyè ne: “Kwangatayè mukàndà wèndè wà dyanyisha dyà buyiishi ne kuwayè ku kabòndò e kuwùpandayè tupese tupese,

ne kutwimanshayè mu kabòndò amu, kwambayè ne: ‘Ncyèna muswè kàbìdì kwikala bwalu nànsha bùmwe ne biinè bintu abi to.’”

Yèyè ne: “Ê, mukalenge!” Yèyè ne: “Kabìvwa bikèngela bwà kwenza nànkù to.”

Yèyè ne: “Kaa, Jim, nkààdi mulekèle byà dikwàcila Mukalenge mudimu abi.”

Ki kutungunukayè, kwamba ne: “Bwà aci kwèna wambìlamù to.”

468 Ki yèyè ne: “Dìbà adi kungambilayè, wàmba mùvwàye ùlwa bwà kusonga ma-soupapes èndè, mu Ditùkù dyà diikisha dyà beena Mudimu,” ngeela meeji ne mmùvwàbi. “Ki yèyè ne: ‘Mpindyewu, ndi muswè ùlwe kunkwàcishakù, Jim.’”

469 Yèyè ne: “Nèndwe kukukwàcisha paanyimà pàà mèmè mumanè kufùma mu èkèleeziyà, kàdi kumpàla nèngànji kuya mu èkèleeziyà.”

470 Kwambayè mwàkaalukilaye ne: “Nènku Mukalenge Ramsey ùvwa munkaci mwà kusonga ma-soupapes a kàshinyi kèndè. Yèyè ne: ‘Jimmy, sabùkà musùlù awu. Binwinù byà maalà a kapyà mbikànga mùneemu. Sabùkà musùlù awu ùkasumbilèkù kashètè kàà maalà a byèrè.’”

471 Yèyè ne: “Mukalenge Ramsey, mèmè’s nkààdi mwambùlàmbùle dipiila mu bintu byàbùngi, kàdi ncyàdyàkwambulakù dipiilà dyà kusumbila musadidi wa Mukalenge kashètè kàà maalà a byèrè to.” Yèyè ne: “Bwàlà, mukalenge. Ncyàkwenzakù abu bwalu to.”

472 Kàdi awu ne: “Kàdi, ndàaku. Ndà kansumbile, Jim.”

473 Yèyè ne: “Mukalenge Ramsey, nkusongèlè mèmè ma-soupapes èbè awu. Kàdi bwà dikupetela maalà a byèyè, wàya kadisumbilawù wèwè nkààyeebè.” Yèyè ne: “Ncyàkuyakù kasumbila musadidi wa Mukalenge cintu bu nànkù to.”

474 Ki Ramsey kwelayè cidya mu kàshinyi kàà Jimmy, kuyayè dyàmwàmwà dyà musùlù; kwalukilayè, mwenzè bu musalùke, ne kashètè kàà maalà a byèrè, wènda ùànwa.

475 Kubangayè kupweka, ki kusaamayè. Nwamònu anyi? Nzambi kàcivwa mwà kwakula nendè to, Mèmè nkààvwa mumudimwije. Nkààvwa mwenzè cyònsò cìmvwà pàànyì mwà kwenza aci. Mwanèètù Smith muyè kùdiye ne mumudimwije. Muntu yònsò muteetè bwà kwenza cyònsò cìvwàye pèndè mwà kwenza aci. Nànsha nànkù, yèyè ùkùpa ànu mutù. Cyàkenzekà ncinyi? Wàkasaama e kufwàye. Ki civwà cileeya ne ùvwa muntu musungidibwe. Piikalàbi ne Nzambi kàvwa mwà kumufikisha. . . kumufikisha ku ditùmikila, nebikengelè bwà kuumumushaYè pa buloba kumwaluja Kumbèlu. Ki cyòci aci menemene cidì Bible mwambè. Ki cidì Bible mulayè. Wèwè kùyi utwàla dilongodiibwa to, bikèngela wàlukilè Kumbèlu.

476 Pa nàнку Nzambì kèna mwà kukujiimijakù paanyimà pàa Yèyè mumanè kukusùngila nànsha, kàdi Udi mwà kwipidija matùkù èbè a pànwapa, ne kukufikisha ku diyooba bwà mpèkaatù ne mpèkaatù yònsò ùdi mwenzè. Pa nàнку, wèwè wenza mpèkaatù, nebikengelè bwà ùyoobè bwà byùdi mwenzè abi. Vùlukàayi ànu aci.

477 Mpindyewu, mpindyewu Mukalenge ikalè neenù. Ndi ngiitabuuja, dilòlò edi ne, Mwanèètù Ramsey ùvwa musùngidiibwe. Kakùyi mpatà, ki cìndi mèmè ngiitabuuja. Kàdi kàvwa ànu muswè kutùmikila Nzambì to, nènku pàvwaye kàyi muswè kutùmikila Nzambì to, bivwa bikèngela bwà Nzambi kumwalujaYè Kumbèlu. Ki cintu cìmwèpelè cyà kwenza, bwalu, cìvwa ncinyi? “Ùvwa mufwànyine kutwàla bundù ne dipangila dyà ngàsà pa Mashi àvwàye mujidiibwe naawù awu.” Ncyà bushùwà anyi? “Ne kubala cipungidi bu cintu cyà pàtupù,” piikalàbi ne kí ng’aci menemene cidì mukàndà wà Ebèlù ewu mwambè. Nwamònu anyi? Kí mbifwànyineku kwenzeka bwà yèyè kwikala mujimìne to, kàdi ùvwa mufwànyine kutwàla bundù ne dipangila dyà ngàsà, pa nàнку bivwa bikèngela bwà Nzambi kuumumushaYè pa buloba ne kumwaluja Kumbèlu. Ki cyòci aci menemene cidì cyenzèke.

Mpindyewu Mukalenge ànùbènèshèku, patùdi twinyika mitù yetù katanci kakesè cyanààna bwà disambila apa.

478 Mpindyewu, Taatù udi mutàmbe cijila ne wa ngàsà, ncyà bushùwà ne tudi ne kusàkidila Kùdi bwà mulayi wutùdi naawù, wà ne Wèwè kwàkutùshiya anyi kwàkutùlekelakù to. Utu mulayè ne Wèwè neuye neetù too ne ku ndekeelu kwà mwoyi wètù, ne mu lufù neWikalè pabwipi neetù. Utu mutùlayè ne tuvwa ne Mwoyi wà Cyendèlèlè. Udi mutùpèesheWù cyanààna kakùyi difùtu to. Katwènakù mwà kuWùjimija to. “Ewu yònsò udi ulwa Kùndi, ùdi ne Mwoyi wà Cyendèlèlè.” Piikalàci m’Mwoyi wà Cyendèlèlè, kaWèna ne ndekeelu to, ne Wèwè udi mulayè bwà kutùbiisha ku lufù mu ditùkù dyà ndekeelu. Bwà cyòci eci tudi ne kwanyisha kwàbùngi. Tudi ne kusàkidila mùdi Dìyi Dyèbè ditùlongesha cyòci eci. Didi ditùpèesha ditèkemena ditwishiibwe. Didi ditùfikisha ku dimanya ne Taatù wetù ùdi Dinanga. Yèyè mmutùngè, ne Yèyè ngwàkatùsungula. Wèwè wákamba ne: “Nwènu kí mbàdi baNsungùle to, kàdi Mèmè ngudi munùsungùle ne munùtèeke mu mudimu.” Nènku ndi nKusàkidila, Taatù, bwà mÙdi mwenzè nàнку. Ne bààbùngi mbasòmbe kaaba aka, dilòlò edi, ne bàtù balongolwela Mwoyi wà Cyendèlèlè abu, ne baakidile Yesù Kilistò bu Musùngidi wabò sungasunga. Ne mamuma a Nyumà àdi àshìndikija nsòmbelu wabò: musàngeelu, bupòle, didipwekesha, dinanga, disànka, ditalala, mwoyi mule, bwìmpè. Tudi ne kusàkidila bwà bóbò abu.

479 Nènku tudi tulòmba, Taatù, bwà ne ní kùdi bàmwè mwab’ewu, dilòlò edi, bàdi kabàyi ne mamuma awu

àbàshindikija to, kàdi biikàle beeyèmène bintu kampànda byà cikùmà, bwalu bàkaavwakù balùndùke, ditùkù kampànda, bwalu bàakasaluka, bàakadyùmva bîmpè, bàvwa mwà kwikala beelè mbilà, mbafwànyine kwikala benzè bintu byàbúngì. Kàdi, Taatù, bôbò kabàyi ne mamuma a Nyumà, àdi àbàlama ku ditùkù ne ku ditùkù mu dinanga dyà kashèndèdè, bàfwila beena lukunà bààbò luse, bàlongolola bilèmà byàbò, ne biikàle ne nsòmbelu wa ditalala ne wa dinanga, ne kalolo ne musàngèelu muntu kùdi mukwèndè, ne lukunukunu bwà Èkèleeziyà, dinanga bwà Kilstò ne bwà bânà Bèndè to, Éyì Nzambi wa Cyendèlèlèlè, bàfwilèku luse. Nànsha bôbò biikàle bidimba byà èkèleeziyà, bidimba byà mubidi wà pa buloba, swàku bwà bàye mpindyewu bàkatèèkè ku luseke midimu ya musunya, mifwè ayi, ne bàkoleshè lwendu batàngile ku bupwàngàne. Enzàku nàнку, Mukalenge. Swàku bwà bàlwe kùdi Mupwàngàne awu ne bàMwakidile bu mulàmbù wàbò wà kujumija naawù mpèkaatù yàbò, bwà kwimanaYè bu mulàmbù mupwàngàne bwà mulùmè mupùile ne mukàji mupùile. Ne bàpetèshèku ngàsà Wendè ne dinanga ne ditalala, too ne mwàbwelàbo mu Bwikadi bwà Nzambi bwà kwikalabò ne mwoyi kashidi. Enzàku nàнку, Taatù.

Patùcidi ne mitù yètù miinyika apa:

⁴⁸⁰ Kwòkù muntu mufwànyine kuswa kushintakaja nsòmbelu wa musunya wa mèyi matùma, wa mabàtiiza, wa masaluka, wa tuntu twà tukesè twà musunya twà mùshindù awu, ku mwoyi mulelèlè mùle tètè ne dinanga dilelèlè, bwà—bwà wamònakù mwà kuya tàmakàtàmakà too ne pàdi mwena lukunà webè wa menemene awu, kumwela mabòkò kunshingù kwamba ne: “Mwanèètù, nènkusambidilè. Ndi mukunangè.” Wèwè muswè kushintakaja dilabula dyà bintu byà musunya adi ku dilabula dilelèlè dyà dinanga, udikù mwà kwela cyanza cyèbè muulu kùdi Nzambi anyi, ne kwamba ne: “Nzambì, ngangatèku dilòòlò edi, ne mvwijèku civwà cikèngelà bwà mèmè kwikala aci” anyi? Mèmè nènūsambidilè, ku cyambilu eku mene. Nudikù mwà kujinga disambila anyi? Elàayi byanza byènu muulu.

⁴⁸¹ Nzambi àkubènèshè paanyimà apu, mukalenge. Nzambi àkubènèshè, mwanèètù wa balùme. Kùdi mukwàbò muntu anyi? Nzambi àkubènèshè, mukalenge. “Ndi mu èkèleeziyà kùkaadi bidimu.” Nzambi àkubènèshè, mukalenge. Nzambi àkubènèshè kaaba aka, mwanèètù wa balùme. Nzambi àkubènèshè paanyimà apu, inàbànza mukesè. “Ndi muswè kulòmba Nzambi bwà àmvwijèku ne ditalala.” Udi. . . Udi uvuma ne cijji cyà menemene anyi? Udi ne cilunji cibì anyi? Udi wela mpatà anyi? Udi utànkakana anyi? Udi udikonka nì nCilelèlè menemene anyi ncyà mafi anyi? Paùdi ulwa kùdi Kilstò, udi ulwa ne ditwishiibwa dyònsò, ne mwoyi mùle tètè ne dinanga anyi? Udi usemena kùdiYe kùyi ne bwòwà, wamba ne: “Ndi mumanyè ne Yèye n’Taatù wanyi” anyi?

482 Nènku kakwèna dipiishibwa to, wâmanyi kuumuka ku lufù wâyi ku Mwoyi. Udi mumanye nânku. Ne udi umòna nsòmbelu webè: udi unanga, udi ufwilangana luse, udi ne musàngeelu, udi ne ditalala, udi mupòle. Mamuma ònsò a Nyumà aa àdi àshindikija nsòmbelu webè, ku ditùkù ne ku ditùkù. Ne paùdi ànu ne wenji cintu kampànda cyà cibi, kaa, ekèlekèle, pàdibi ànu ne cyàkuvwidì mu meeji ne wenji bibyèè, ne lukàsà lwònsò udi umba ucilongolola, ànu dībà adi mene. Kùyi windila kasunsa kakwàbò to, uya ukacilongolola ànu piinè apu. Kùyi ucyènza to, èè, kwèna ne Nyumà wa Kilistò to. Udi mufwànyine kwikala mukàji mwîmpè, udi mufwànyine kwikala mulùme mwîmpè, udi mufwànyine kwikala wa bèèlela meeji mîmpè mu èkèleeziyà, udi mufwànyine kwikala wa bèèlela meeji mîmpè kùdi beena mutumba, kàdi udi muyè too ne ku bupwàngàne abu, mu mùshindù wà mwikàle ne dyeyemena mu kaabujimà kùdi Kilistò anyi? Ne ku cyòci eci, cikupèèsha citampì. “Abraham wàkiitabuujà Nzambi, ne cyàkabadiibwa kùdiye bu bwakàne. Pashiishe Nzambi wàkamupèèsha citampì cyà ditengudiibwa, bu dishindika.”

483 Mpindyewu wèwè udi wamba ne: “Ndi ngiitabuujà Nzambi. Ndi mwenzè dijikula.” Kàdi Nzambi mmukupèèshe citampì cyà Nyumà Mwîmpè, mwalùje pa nsòmbelu webè, cyà dinanga, disànka, mamuma a Nyumà, bwà kujaadika ne wasungidiibu anyi? Yèyè kàyi mwenzè aci to, dībà adi Yèyè kì mmwanji kwitaba diitabuujà dyèbè to. Cyùdi mwenzè cidi ànu dijikula cyanààna. Yèyè kì mmucitàbe to, kùdi cintu kampànda kaciyi cyènda bîmpè to. Udikù muswè kuMwakidila anyi, dībà adi? Elà cyanza muulu, ní kùdikù mukwàbò muntu, kumpàlà kwà twètù kusambila.

484 Nzambi àkubènèshè, nsòngààkàji wa citende. Nzambi àkubènèshè pèbè, paanyimà pààpa. Nzambi àkubènèshè. Èyo. Kùdikù mukwàbò anyi, kumpàlà kwà twètù kusambila? Èyo. Nzambi àkubènèshè, paanyimà pààpa, mwanèètù wa bakàji. Nzambi àkubènèshè, mwanèètù wa balùme. Nzambi àkubènèshè, mwanèètù wa balùme. Nzambi àkubènèshè, mwanèètù wa balùme. Ncyà bushùwà. Byanza bitwè ku dikùmi, dikùmi ne bitaanu mbyediibwe muulu.

Mpindyewu túsambilàayaaku.

485 Mukalenge mubènèshibwe, mu nkwasà wudibò basòmbèle amu, ki mùdibo bapetèle cyoshelu. Mu nkwasà wabò, mùdibo basòmbèle mpindyewu amu, ki mŪdì mwakwile ne myoyi yàbò ne “mbapiile.” Mu nkwasà yàbò amu ki mŪdì mutèèkèle dijinga mu myoyi yàbò ne, bàdi “bàjinga bàmba kufwà bwà kwikala bu Yesù.”

486 Mbaswè bwà nsòmbelu wabò àshintulukè. Mbaswè kwikala bapòle ne badipwekèshe. Mbaswè kwikala ne musàngeelu ne bùle tètè ne lutùulu. Mbaswè kwikala ne mwoyi mule,

bàà bàtwàla maalu. Mbaswè kwikala bafwànàngàne ne beena Kilstò, bafwànàngàne ne Kilstò, mu mûshindù wà bàà pa buloba bàmba, pàdìbo bènda bàpweka ne mùsèèsù apu ne: “Wàwa mulùme’s mmwena Kilstò wa cyà bushùwà. Wàwa mukàjì’s mmwena Kilstò wa cyà bushùwà. Kaa, bôbò abu’s mbantu bàdi batàmbe kwikala ne musàngeelu, batàmbe kwikala bapòle, batàmbe kwikala ne kalolo!”

487 Enzàku nàнку, Mukalenge, bwà bàpetèku dilabula adi, dilòòlò edi. Ne swàku bwà kabèeyemenyi dikùmbanyina dyà èkèleeziyà wabò, diswikakana dyàbò ne èkèleeziyà kanà yònsò, ne dîngumba kanà dyònsò to; anyi masaluka àbò, cintu kanà cyònsò cyà cikùmà, bu mùdi masaluka, anyi cintu kampànda cidi cyenzèke to; bàdi mwà kwikala beelè mbilà, baakùle mu myakulu, anyi cintu cikwàbò kampànda.

488 Éyì Nzambì wa Cyendèlèlèlè, kabàteeciku kweyemena bwà kuya mu Dyulu biimànyine pa byòbì abi to, bwalu tukàadi babimònèmòne misangu yàbùngì bipangile byenzè ne bibi. Ne Wèwè utu mwambè ne nebìpangilè: “Nì mmyakulu, neyìimanè! Mwaba wùdi cipròfetà, necijiminè. Mwaba wùdi dimanya, nedijiminè. Kaa, mwaba wùdi bintu byònsò ebi, nànsha mapà, bishimà byà dyondopa, nebyùmushiibwè byònsò. Ànu dinanga dyà Nzambì adi ndyàshàlà.”

489 Nzambì, juulàku cyòcì aci mu myoyi yàbò, ne bôbò bàmanyèku ne aci ki Nyumà udi utwàla mamuma. Ucyènzèku ànu mpindyewu, Mukalenge, patùdi baKwindile apa, bwalu tudi tulòmba nùнку mu Dîna dyà Yesù. Amen.

490 [Katùpà kàà mukàbà wà mèyi munda mutupù—Muf.]... mabùlù a midilu àdi munkaci mwà kubùuka, ne tumòna tuumàndànkùcì tùtwa kumpàla tùtwa paanyimà mu citanda cijimà, tumòna Kilstò ùbwela ne mèbà mu byanza Byèndè, ne mu Byèndè... Kaa, nukààvwakù bamanyè ne aci ncintu cilongolola kùdi mufwilakanyi ne Kilstò anyi? Yèyè wàkamba ne: “Pààbangà bintu ebi kwenzeka, dîbà adi nùbandulukè, bupikudi bwènù bùkaadi bùseemena.” Nènku ki bwà cinyi ndi muswè kukolesha lwendu ku kasunsa kònsò kàndiku mwà kukolesha aku bwà èkèleeziyà, ne kunùvwija bashindàme. Bidi mwà kwenzeka ne Mwanèètù Neville kùkadi ànu neetù misangu yònsò to. Mémè ndi ngiitabuujà ne Mwanèètù Neville mmulongeshi mwimpè, mushindàme wa Èvànjeeliyò. Katwèna bamanyè cyàdìfindà mu cyambilu eci to, ne, pààfikàci bushùwà kaaba aka: “Mikòòkò Yànyì mmimanyè Dîyi Dyànyì.” Shààlaayi ne Dîyi adi. Kanùshiyikù Dîyi adi to. Shààlaayi ànu naaDì. Imànaayi kamùngùlù mu budishikaminyi mùdi Kilstò munùvwijè badishikàmìne amu. Kanùkwàciki mu bikòkedi byònsò byà bupika ne bikwàbò abi to. Ikàlaayi biimàne kamùngùlù, ne biimàne badishikàmìne. Nzambì neànùbènèshè. Katwèna pa buloba apa ne cyà diciina to.

491 Nudi misangu yònsò ànu nudyèla nkonko. Ndi mmòna bantu bàlwa bwà kubàsambidilabò, bàdifinda mu mulongo. Musangu wùdi wùlondà wùdibo bàmmòna kàmpanyè kàà dyondopa, bàdi bàbwela mu ewu mulongo, bàbwela mu ewu mulongo. Mémè ncyèna mbàpiisha to. Cidìbo bàkèba mbwà kupetakù diikisha, kàdi bàyaaya mu mùshindù mubì. Nudi nucyènza cyaanza-mwandamuna, cidi Nzambi mwambè ne kanwènjì to. Nwamònu anyi? Paùdi uya tàmakàtàmakà too ne ku Nkwasa wa ngàsà, ne witabuujà, ne: “Lòmba, neùpetè,” shààla naaCì. Mùshindù awu ngùdìbì byènjìibwa; kí nkunyeemakana ànu ku citanda ne ku citanda, ku èkèleeziyà ne ku èkèleeziyà, ku kàmpanyè ne ku kàmpanyè to.

492 Mòna's, mbavwijè tùmpanyè twà dyondopa etu bu mushikì wà lukutukutu. Bushùwà, ncidìbo benzè. Byàfikì mu mùshindù wà ne, bantu bàà lungènyi, bàkènzakana eku ne eku kàdi kudìkonka ne biinè byònsò ebi mbinganyi. Mòna, Nzambi kàtu muswè bintu abi to. Kabyèna bikèngela bwà dyondopa diikalè ànu mu tùmpanyè nànsha. Bivwa bikèngela bwà dyondopa diikalè mu èkèleeziyà ne èkèleeziyà yònsò wa pa kaaba, mapà ònsò aa miikàle àkwàta mudimu. Kàdi kanùyì ne kwà nàka ne mapà awu to. Kanwikadikù batùme ntèmà ku dipà to. Nzambi Yèyè muswè kukwàta neebè mudimu bwà cintu kampànda, Yèyè neacyènzè. Kàdi, kèbaayi Mufidi.

493 Martin Luther, paanyimà pàà yèyè mumanè kwakula mu myakulu, bàakamukonka bwà cinyi kàakaciyiisha, kwambayè ne: “Mémè muyiishè aci, bantu bàànyi nèbàditwè mu dilondangana ne dipà pamutù pàà Mufidi.” Ncyà bushùwà.

494 Moody, musangu kampànda, munkaci mwà kwakula, kàdi kubangayè, pàvwàye ùyiisha mu disonsodiibwa dikolè, kwakulayè mu myakulu. Kwambayè ne: “Nzambi, mfwilèku luse bwà dyakula dyà yakù mikùtakàne eyi bu mwelè màyi mukana.” Bushùwà's. Nwamònu anyi? Nènku bàvwa ne bintu abi. Twètù tudi twitabuujà bintu abi, kàdi bìdi ne cyà kutèekiibwa pa kaaba kààbì. Ne kabyèna mwà kutèekiibwa bu ne mbilejeji nànsha.

495 Kakwèna cintu nànsha cimwè cishìya mu Bible, bu mùdì “cileeji cyà Nyumà Mwìmpè” to, pa kuumusha mamuma a Nyumà. Mpetèlaayi kaaba kàmwè kàdiku Yesù mwambè nàнку awu. Èyowà's, mukalenge. Cileeji cyà Nyumà Mwìmpè mmamuma a Nyumà webè awu. Kì mwàkambà Yesù ne: “Kù mamuma àbò nkunwàbàmanyinà.” “Ne mamuma a Nyumà àdi dinanga, disànka, ditalala, mwoyi mule, bwìmpè, ditalala, musàngèelu, bupòle. Ne mamuma a mwena lukunà àdi lukunà, lukinu, budimù, dikòkangana, ne bikwàbò; kì mamuma a mwena lukunà ngòwò awu.” Pa nàнку, udi mwà kulumbulwisha ku mùshindù wùdi nsòmbelu webè, mwaba wùdi mwimànyine ne Nzambi. Mwoyi webè mujimà wòwò mu dinanga Nendè, ne wèwè muMunangè ne mwikàle ne musàngèelu, ne mwikàle ne

mwoyi Nendè ku ditùkù ne ku ditùkù, apu udi umanya ne udi muumùke ku lufù muyè ku Mwoyi. Kabiyi nàнку to, ne wèwè mwikàle mûngà mùshindù, udi ànu utentula mwena Kilistò. Aci ncyà bushùwà. Nènku, ncyà bushùwà ne matentula ònsò a mu musunya neèdiibwè patòòke. Aci tudi bamanyè.

⁴⁹⁶ Pa nàнку, kwikadi ne nsòmbelu wa mùshindù awu to, kabyèna bikèngela bwà wikalè nendè nànsha. Bwà cinyi bùdì mufwànyine kwitaba mupinganyi, pàdì maulu majimà a kuulu mùle tètè ne byà bìmpè ne bilelèlà? Bushùwà. Ndekèlà ngàngatè Nzambi, ki cìndi mèmè muswè. Amen.

⁴⁹⁷ Mpindyewu, kùdikù muntu mulwè bwà kumusambidilabò anyi? Pawikalà mulwè, elà cyanza muulu. Tuvwa benzè mudimu wà dyondopa mu dindà emu. Ndi ncinka dîbà adi. . . Inàbànza ewu anyi? Èyo, mwanèètù wa bakàji, dîba adi udikù mwà kulwa kumpàla eku anyi? Nènku mwanèètù, mukùlù wetù, kaaba aka, àlwe mpindyewu bwà dilaaba dyà maanyi. [Katùpà kàà mukàbà wà mèyì munda mutupù—Muf.]

. . . nkenkèshilè;
Kaa, nkenkèshilèku, Mukalenge,
nkenkèshilèku,
Bukènkè bwà ku kaleyi bünkenkèshilèku.

⁴⁹⁸ Yèyè kî ngwa ùkèmesha anyi? Twìnyikààyikù ànu mitù yètù, mu cimùmà cyà menemene mpindyewu. Nènku: *Nkenkèshilèku*, cyàkàbidi. Mpindyewu, lwàyaaku mpindyewu, bantu bònso, bwà: “Nkenkèshilèku. . .” Mukuukwilè ànu cyanààna mu musùkà wèbè mpindyewu, nwamònu’s, nushàala cimùmà. Mudimu wà dyondopa wùkaadi wùseemena. Diyiisha dyàjiki. Tùkuukwilààyaaku.

Bukènkè bwà ku kaleyi bünkenkèshilèku;
Kaa, nkenkèshilèku, Mukalenge,
nkenkèshilèku,
Bukènkè bwà ku kaleyi bünkenkèshilèku.

Kwikala ànu bu Yesù, kwikala bu Yesù,
Kaa, pa buloba ndi njinga kwikala bu Yèyè;
Mu lwendu lwònsò kuumukila pa buloba too
ne ku Butùmbi,
Ndi ànu ndòmba bwà kwikala bu Yèyè.

Netwèndelè mu Bukènkè, Bukènkè bulenga be,
Tulwa mwaba wùdì mamata a lumuma a luse
àbàlakana;

Kenkèshàku mu nyùngulukilu wetù mwònsò,
muunya ne butùku,
Yesù, Bukènkè bwà bàà pa buloba.

Nwènù bònso bansantu bàà Bukènkè ambàayi
patòòke,
Yesù, Bukènkè bwà bàà pa buloba,

Dìbà adi ngonga yà mu Dyulu neyidilè,
Yesù, Bukênkè bwà . . .

Twákidilèku, Mukalenge, patùdi kuKukuukwila apa.

Netwèndelè mu Bukênkè, Bukênkè bulenga be,
Bùlwa mwaba wùdi mamata a lumuma a luse
àbàlakana;
Kenkèshàku mu nyùngulukilu wetù mwònsò
muunyà ne butùku,
Yesù Bukênkè bwà bàà pa buloba.

⁴⁹⁹ Kanwènaayikù banangè dikezudiibwa adi anyi? Nudikù nudyùmvwa bimpè anyi? Elà cyanza muulu, ambà. Kùdi cintu kampànda mu misambu yà cyena-kale ayi, miyengà yà bikondo byà kale ayi. Mbipiciibwe ne mèmè mwikàle naayi yòyi ayi pamutù pàà misambu yònsò mipyamìpyà yà cyena-leelù yidibo babwejèmu, ne mu èkèleeziyà yà bwena Kilistò eyi. Ndi mèmè munangè yà cikondo cyà kale ayi, nyíndi munangè.

Yesù, ndamèku pabwìpi ne nkùrusè,
(Ekèlekèle!)

Mwaba awu mpokolo wa mushinga mukolè,
Wa kabàyi bàfuta to bwà bònsò, musùlù wà
Iwondàpù,
Wùdi wùpòngoloka wùmukila ku mpokolo wa
Kàlvaryò.

Mu nkùrusè, mu nkùrusè,
Kaa, mwikalèku bwànyì butùmbi kashidi;
Too ne pààpetà musùkà wànyì mwambwibwe
awu
Diikisha dyàmwàmwà dyà musùlù.

⁵⁰⁰ Ndi mufwànyine kuumuka pa buloba apa ànu bipeepèle menemene ebi pàdi aci cìmbiibwa apu. Kàdi nwènu? Bilenga be! Cyàlongòlòdiibù cyònsò anyi? Nudi bamanyè's, ndi ne disànkà dyà kwikala mulongòlòle byònsò. Kàdi nwènu? Cilumbù cyà kale aci ncimana kulongolola, kùkaadi ntàntà mule. Nkààdi muMwambìle ne: “Mukalenge, ncyèna muswè lutàtu ku musùlù to. Ndi—ndi muswè ngiikalè mutwishiibwè mpindyewu.” Ndi muswè mMumanyè. Ndi muswè mMumanyè.

⁵⁰¹ Kùdi dijìmbà dinène, dyà mìdimà ditèèka kumpàlà kwà yònsò wa kutùdi. Tudi twenda tuya batàngile kwòkò aku. Musangu wònsò wùdi ànu mwoyi wètù wùtuuta, tudi twenda tusemena twenda tusemena. Kàdi pàngààfikàku, ncyèna muswè kuzakala byenzè bu muntu mutulùmùke nànsha, ndi muswè ngiikalè mudijingile mu mùzàbì wà bwakàne Bwèndè, kubwelamù, mumanyè nùku, ne: “Ndi muMumanyè mu bukolè bwà dibìkà Dyèndè dyà ku lufù.” Bwà ne, pààbìkilàYe, ngaapàtuka munkaci mwà bafwè.

Dyànyì . . .

502 *Diitabuuja Dyànyì Nditàngìlè Kùdì*, tùwîmbààyaaku mpindyewu.

Diitabuuja dyànyì nditàngìlè Kùdì,
 Wèwè Mwânà wa Mùkòòkò wà ku Kàlvariyò,
 Éyì Musùngìdì wa kùdì Nzambì;
 Mpindyewu ngumvwilèku pândì nsambila apa,
 Umùshàku mpèkaatù yànyì yònsò,
 Kùndekèdìku mpàmbuka
 Nya kule ne luseke Lwèbè nànsha.

503 Mpindyewu, Mulongeshi munène, muWàtùlongèshì mu Dìyì dyèbè dìdì dītàmbe kukèmesha adi, myoyi yètù yìdì ànu yizakala, ne ngàsà wa dyambwibwa, patùdì tumanya ne tudì buumùke ku lufù bayè ku Mwoyi. Byònsò abi nku bwimpè bwà Mukalenge wetù Yesù, Udi mutùbìikìlè, ne mutùsukùlè mu Mashi Èndè, ne mutùleejè kumpàlà kwà Nkwasa wa butùmbi wa Nzambì awu, katùyì kalèma, katùyì kadyuwù, bwalu Yèyè mmwangàte mpèkaatù yètù. Katwèna ne mpèkaatù nànsha umwe to. “Nzambì mmwelè bubì bwètù bònsò pambidi Pèndè, ne Yèyè wàkatàpiibwa mpùtá bwà kushipa kwètù kwà mikenji.” Kaa, mùshindù mwinè wutùdì baMunange’s wè, Mwânà wa mùkòòkò munène wà Nzambì awu!

504 Nènku nyewù tulòmba, Taatù, bwà Ûtùpèèshèku mwà kupàtùla mèyì, byakwidi, bwà twamònakù mwà kwambila bakwàbò, bwà bààmòna mwà kuMumanya pààbò, ne kuMunangabò, bwalu mMubànangè. Tùpèèshèku mwinè ngàsà ewu.

Nènku tudì tuKusàkidila, Taatù, bwà bânà balela bapyabàpyà bàà mu mabòkò báfumu ku dibwela mu Bukalenge bwà Nzambì abu. Swàku bwà bààpetakù mu mwaba kampànda èkèleeziyà mwimpè wa bàdyùmvwà bu kwàbò kumbèlù, ne mwómò amu bàKusadilè too ne pààlwà lufù kubàsùlùlula ku mubidi wà kale wà mikenyi mikolè ne màsaamà ewu, ne kubàleeja kumpàlà Kwèndè, kabàyi kalèma, kabàyi kadyuwù, mu cikondo cìcìlwalwà, biikàlè ne Mwoyi wà Cyendèlèlèlè. Bwalu tudì tulòmba nùnkù mu Dìnà Dyèndè. Amen.



EBÈLÙ, NSHAPÌTÀ MWISAMBÒMBÒ ² LUA57-0908E
(Hebrews, Chapter Six ²)

DILONDANGANA DYA MALONGESHA PA MUKÀNDÀ WÀ EBÈLÙ

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyàlumingu dilòlò, mu matùkù 8 a ngondo wa citeèmà, cidimu cyà 1957, mu Branham Tabernacle mu Jeffersonville, Indiana, U.S.A. Ndyumusha pa mukaba wa mēyi ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org